

NKONKO NÈ MANDAMUNA

 Mwoyi wènù awu dilòòlò edi, balundà bàànyì, mbîmpè bwà kwikala kaaba aka dilòòlò edi. Nènku mèmè, mùshindù wùdi byònsò ebi bimvwila, mbwalu mvwa ngèèla meeji mu dindà emu bwà mwanèètù wa balùme, nè mùshindù wùndi mumanyè cidi masangisha àbìdi ku ditùkù ènza.

² Nènku mvwa—mvwa nè *disansakana* ndambù pa muminu wànyì apu; ndi nyiisha bikolè be. Nènku pashiishe pândi ànu mbwela mu cimenga emu, mu cibandabanda eci, cilàkàlàkà cikesè lwà paanyimà kuumukila ku cintu, eci, mùdìbo bàcibìikila, cyuyuyà eci cidi kaaba aka mu cibandabanda emu, cidi ànu citungunuka nè kucyùja bibi byà menemene mu mùshindù wà bìkèngela bwà mèmè kutungunuka ànu nè kumina matè díbà dyònsò pândi nsanganyibwa munwemu mu cibandabanda emu. Nènku pândi nguùmuka, mu ndambù wa matùkù, cidi cishiya kaaba. Ngààlukila, cyàlukila kàbìdi.

³ Nènku mvwakù ngùmvwila Mwanèètù Neville luse, pa kumanya nè—nè tudi ànu pàmwàpa bayè ntàntà mule bikolè mu njila kutàmba munùdi bàmwè bàà ku nwènù bansongààlùmè amu, nè pa nànkù tudi tumwèka mùshindù mukwàbò. Nànkù tudikù tumvwilanga luse muntu nè mukwèndè, nè ciine aci nangananga bu mùdi matùkù matwàdije kuseemena, nè matùkù mabi munkaci mwà kutàmba kuseemena. Nènku díbà adi bu mutùdi bamanyè nè tudi tuumuka tuya mpindyewu, dyàkàmwè, bu Mukalenge mwà kwanyisha.

⁴ Ke mèmè kudyàmbidila nè, nudi bamanyè's, Mwanèètù Boze ùdi nè cyà kwikala kaaba aka mu dilòòlò dyà dyàlumingu dilwalwà edi, ngèèla meeji. Ndi . . . Nukààvwakù bamanyè nànkù anyi? Eyowà, nè mu dyàlumingu dilwalwà dilòòlò. Udi nè—nè mukàbà wà bindidimbi wùdiye muswè kuleeja, wà ngendu yèndè yà diyiisha yà dyàmwàmwà dyà mbù mùdi . . . Ùwà nè ci—cilòòtà cyàkalwà kùdiye kùkaadi bidimu byàbùngi, bwà kulwa ku Chicago. Nè kawkàikwètù kenze nè byà luse aku kudyùmvwakù katàcishìibwe bikolè musangu kampàndà, kwambayè nè mukenji wèndè kacya kawùtukù mukùmbàne to. Ke mèmè kumuumvwijaci mùkaavwa Mukalenge mumanè kuwùkùmbaja. Díbà adi kucyùmvwayè.

⁵ Ke pashiishe Mukalenge kumupèèsha cilòòtà cikwàbò. Nènku pashiishe pààkalwà dyumvwija, kumwambila kwà kuya nè cyà dyenza. Ke kuyayè kuntwaku nè, ekèlekèle, kaa, ekèlekèle, ku Kenya nè ku Tanganyika nè ku Uganda, nè matùnga awu muntwamu, bìdi ànu bilenga byà dikèma bìdi Mukalenge mubenzèle mu ngendu yàbò yà diyiisha. Nè yèyè mmuswè kuleeja cimfwànyì, ànu bwà kuleeja cidi Mukalenge munkaci

mwà kwenza munkaci mwà bantu abu, bifuku byà mu Àfrikè mwàmwa. Bu Mukalenge mwà kwanyisha, mu ngondo wa cyongo, ndi muswè kudisanga nendè kuntwaku bwà... nè bôbô munkaci mwà bifuku abi, bwà disangisha kampàndà ànu kumpàlà kwà mèmè kuya mu Rhodésie nè mu Àfrikè wa ku Sud cyàkàbidi.

⁶ Nènkù, díbà adi, adi ke dilòlòlò dyà dyàlumingu dilwalwà edi, nwavùlukaayi nànkù, mpindyewu. Nènkù sambidilaayi Mwanèètù Joseph bikolè, yèyè mmwanèètù mukesè mulenga. Ndi mumwanyishe bikolè be, bwobùmwe bwèndè nè bikwàbò.

⁷ Pashiishe, lumingu lùlwalwà elu, tudi tuumuka díbà adi tuya ku... bwà kubànda ku Southern Pines, nè pashiishe tupweka mu Colombie, mu Caroline du Sud; nè pashiishe kuumukila aku kuya ku Cow Palace, ku Côte Ouest, pashiishe kubànda kubwela mu Grass Valley; nè ku Cisalu cyà Cinsangànsàngà cyà Buloba bujimà, nè kwalukila ku Oregon kàbidi; pashiishe kubànda mu Colombie Britannique mwàmwa, nè bikwàbò, kutungunuka ànu nànkù too nè paanyimà pàà muvù wà mabèji àpòòpoka ewu. Pashiishe tudi tutèkemenà, mu muvù wà mabèji àpòòpoka ewu, bu Mukalenge mwà kwanyisha, bwà kwenza masangisha makwàbò mwab'ewu, bu Mukalenge mwà kulongolola.

⁸ Pashiishe mèmè kudyàmbidila nè, kumpàlà kwà mèmè kuumuka, ciwwa ciwànyine kwikala cintu cimpè cyà kwelakù ndambù wa nkonko. Nudi bamanyè's, udi ujandula cidi pa myoyi yà bantu pawùdi wamba bwà kwelabò nkonko. Nànkù awu díbà adi mèmè kudyàmbidila, nudi bamanyè's, dilòlòlò edi, bwà kwenzakù ànu muyiiki wà mu mwoyi nè—nè kasumbù kakesè kàà mikòòkò, kàà bantu bàdi mwab'ewu aba, ànu—ànu bwà kwakula neenù byùmukila mu—mu myoyi yetù. Misangu mikwàbò ndi ndyàmbidila nè aci cidi cyènda bimpè kutàmba kuyiisha diyiisha kampàndà, ànu dyumvwangana dyà muntu nè mukwèndè dyà ditàmbe bwîmpè.

⁹ Tudi nè kusàkidila kùdi Nzambì bwà citùdi baMumòne wènza mu lumingu elu mu dyandamuna ku disambila, ncyà pabwàci. Nànkù awu tudi nè kusàkidila, ànu nè kusàkidila kwàbûngi.

¹⁰ Nènkù tudi tumòna cikondo nè cikondo cyà nshìikidilu cyènda ciseemena, bamanyè nè cintu kampàndà cidi pabwîpi nè kwenzeka. Nè kakwèna muntu nànsha umwe udi kàyì mumanyè nè aci ncilelèlè to, piikalàye—piikalàye mwedi wa meeji. Tudi bamanyè nè, tudi bacindilendile munda mwà bikondo, muntu nè muntu útù mucindile. Kàdi, nudi bamanyè's, kùdi byàbûngi byènzeka mpindyewu. Tudi—tudi bamanyè nè cidi ànu... kacyèna mwà kwikala kule to. Nènkù mpindyewu pàmwàpa ndi mufwànyine kwakula pa bîmwè byà ku cyòci aci mu katanci kakesè emu.

¹¹ Kàdi mpindyewu, bwà kubanga, twinyikàayi ànu mitù yètù bwà mwàkù wà disambila. Nènku pàdi mitù yètù miinyika apa, ndi ndikonka ní kùdikù cintu kampàndà mu myoyi yètù, citùdiku baswè bwa kucivùlukabò mu disambila kumpàlà kwà Nzambi. Byòbi nànkù, elà ànu cianza muulu cyanààna. Yèyè neùmvwè, Yèyè mmùmanyè byònsò pa bwalu abu. Ànu dilòmba kampàndà dyùdi muswè kwamba nè: “Nzambi, wamvùlukakù.” Mukalenge àbeneshèku yònsò wa kunùdi.

¹² Taatù wetù wa mu Dyulu, patùdi tuseemena dilòlò edi ku Nkwasa wa ngàsà awu apa, mùdibi nè Wèwè udi mutùtùmine dīyì nè ngàsà yònsò bwà kulwa nè bukitù kumpàlà kwà Nkwasa wa butùmbi wa Nzambi nè ngàsà Wendè, bwà kulòmba dilòmba kanà dyònsò ditùdi naadi dijinga adi. Uvwa mutwàmbile nè bu twètù mwà kudisanga pàmwè bàbìdi anyi bàsàtù nè badisangishè mu Dīnà Dyèbè, nè Wèwè uvwa mwà kwikala munkaci mwètù. Nè pashishe cyònsò citùvwà tujinga aci, twètù bacilòmbè, bìvwa bikèngela bwà twètù kucipeta bu twètù ànu mwà kwitabuuja nè tudi bafwànyine kucyàkidila.

¹³ Wèwè udi mumanyè ngiikàdilù yà ditùkù nè ngiikàdilù yà èkèleeziyà nè yà bantu, nè malòmbà ètù kumpàlà Kwèbè. Mpindyewu, wàMònu byanza's, Mukalenge. Udi mumanyè myoyi yà bantu, nè majinga àbò nè bìdibo bàkèngela. Nènku tudi tumòna nè dībà didi dyenda diseemena, bintu byenda bitàmba kudyungwija mpindyewu, matutu manène nè ènda àdyàdija. Bintu byàkambà bapròfetà kùkaadi nkàmà yàbùngi yà bidimu abi, tudi tumòna nè kacya kabitukù byànji kwenzeka to too nè dībà edi, nènku's ke twètù aba tucimòna mu matùkù ètù aa.

¹⁴ Mpindyewu tudi tulòmba, Taatù, bwà Wèwè kutùpèeshakù mabènesha atùdi tulòmba aa. Ondòpàku babèedi nè beena ntàtu. Alùjùlùlù mu Èkèleeziyà Webè, Mukalenge, bukolè bùdi nè mwoyi bwà Nyumà Mwîmpè, diitabuuja didi nè mwoyi dyà nè citùdi tulòmba eci tudi tucitabuuja. Tudi twitabuuja nè tudi tucipeta bwalu tudi batwishiibwe nè ndiswa dyà Nzambi bwà kutùpèeshaci kumpàlà kwà twètù kulòmba. Katwèna tulòmba bibi to, tudi tulòmba bwà bwîmpè bwà Bukalenge bwà Nzambi, nànkù tudi tusambila bwà Wèwè kutwènzela.

¹⁵ Bèneshakù didisangisha dyètù pàmwè, mpaasàtà wetù, beena mudimu bàà èkèleeziyà, muntu yònsò, bidimba byà Mubidi wà Kilistò wùdi kaaba aka ewu. Aba bàdi kabàyi bidimba byà Mubidi wà Kilistò, bàdi munkaci mwà kukèba cisokomenu mu mwaba kampàndà, bàsùmba cisokomenu cyà ku bòmbè mu bulà bwà kumfundu kwà nzùbu, Nzambi, swàkù bwà bàlwe mwînshì mwà bukùbi busokoki bwà Mukalenge Yesù, bamanyè nè pàajikà mwoyi ewu kùdi Mwoyi dyàmwàmwà dyà ewu ewu. Twasàkidila bwà mulayi awu.

¹⁶ Tùpèeshèku dyandamuna dyà nkonko eyi dilòlò edi, bwà twamònakù mwà kusànkisha mwoyi wònsò nè Dīyì Dyèbè.

Bwalu tudi tulòmba nùnkù mu Dìná dyà Yesù. Amen.

¹⁷ Twenda tuseemena ku dilwa dyà Mukalenge, ditwishiibwa dinène kaayipu's wè!

¹⁸ Mvwa ngààkula katanci aka, muntu kampàndà kwamba cintu kampàndà bwà *assurance*, Mvwa nè Beena Kantu-ku-byanza ànu àbìdì àdì panshì aa mu umwe wa ku mpungilu yàbò, mpungilu wa buloba bujimà. Ndi mubwele ànu mu umwe, wa citùpà cyà buloba. Ndi ngààkula bwà Beena Kantu-ku-byanza bàà Èvànjeeliyò mu Kaabujimà, bàà pa buloba bujimà. Nènkù dībà adi mpungilu ewu—ewu wùdì ku Côte Ouest, nè bantu bònsò bàà bamanyike bikolè abu basòmbe mwaba awu bàfùmina pa buloba bujimà, nè . . . bavwàle nànkù nè bàà kuneemekiibwa. Umwe wa kùdìbo kungambilayè nè: “Ndi muumvwe muntu kampàndà ùkubìikila nè ‘Révérend.’”

Mémè nè: “Èyowà's, mukalenge.”

Yèyè nè: “Wèwè udi muyiishi anyi?”

Mémè nè: “Èyowà's, mukalenge.”

Yèyè nè: “Cyùdì wenza nè beena kantu-ku-byanza abanncinyi?”

Mémè nè: “Ndi—ndi mwena kantu-ku-byanza.”

“Kaa?” mwàkambàye, “Mmushinga wà mùshindù kaayi wùdìmu?”

Mémè nè: “Ditwishiibwa.”

¹⁹ Yèyè kungumvwa bibì, kudyàmbidilayè nè mvwa muswè kwamba nè *assurance*. Ke kungambilayè, wàmba nè: “Udi wa mu kùmpànyì kaayi?”

Mémè nè: “Kùmpànyì wa mu Dyulu.”

Yèyè nè: “Ncyèna ngèèla meeji nè ndi mumanye awu to.”

Mémè nè—yèyè nè: “Ng'assurance wa mùshindù kaayi—kaayi wùdì usùmbisha?”

²⁰ “Kacya ncitukù,” mungààkambà, “ncitukù mwambè nè *assurance* to, mvwa mwambè nè *ditwishiibwa*.”

Yèyè nè: “Udi uswa kwamba cinyi?”

Mémè nè:

Ditwishiibwa dibènesha, Yesù ngwanyì mémè!

Kaa, kààdyosha kaayi kàà butùmbì bwà Nzambi's wè!

Mupyànyì wa lupàndu, musùmba kùdì Nzambi,

Mulela ku Nyumà Wendè, musukula mu Mashi Èndè.

²¹ Pa nànkù, dilòòlò adi pakandeejàbo kumpàlà kwà bantu bwà muyiiki wà ku tudyòmbà twà bindidìmbì, mémè kucìlonda. Ke mémè kwamba nè: “Mpindyewu, ndi—ndi nè tubèjì twà

assurance mwab'ewu pìikala muntu kampàndà wa kunùdi mwab'ewu anyì pambèlu mu ditùnga mwàmwa, udi bwalu bwà kabèji kàà assurance kàmutàngila, ndi muswè kuyiikilangana neebè pa bwalu abu paanyimà pàà disangisha. Ditwishiiibwa, ditwishiiibwa dibènèshiiibwe!”

²² Mpindyewu, mèmè kudyàmbidila, mu dyela dyà nkonko eyi, nè mbifwànyine kumpèesha mùshindù kampàndà mukesè wà kuseemena ku meeji ènù—ènù. Ndi naayi yibìdi. Kàdi ndi mwenze ànu mbwela mu ciibi Billy kwamba nè yìvwakù mipìte apu, kàdi, mu bushùwà bwà bwalu, ncìvwa mupetè mpùngà wa kuyitàngila to. Nènku ndi muswè kwikala mutwishiiibwe nè ndi mubinge bilondèshile Mifùndu kumpàlà mene kwà mèmè kuyàndamuna, bwalu wèwè uvwa...muswè bwà kwikalabi mùshindù awu, anyì kumpàlà kwà mèmè kuyàndamuna. Pa nànkù pàmwàpa ndi mwà kulama ayi bwà musangu mukwàbò kampàndà. Mpindyewu, lùmwe lwà ku...Nènku mu dyandamuna dyà nkonko eyi mpindyewu, nwàvùlukaayi nè, ndi ngènta ànu mwànyì pàànyì mwònsò mùndi naamù amu.

²³ Ncyèna ngàndamuna ku nkonko mu masangisha to. Mvwa muciteetè musangu kampàndà kàdi mèmè kupeta lutàtu. Bàvwa bangùmvwè bibì. Cìvwa mbwà Mukalenge Allen, anyì bwà cileeeji cyà mashi nè maanyì nè bikwàbò, mu byanza nè mumpàla, ciikàle cileeeji cyà Nyumà Mwìmpè. Mèmè nè: “Èè, ncyèna mumanyè aci to,” mèmè nè, “ncitukù mwànji kumòna cintu nànsha cimwè pa bwalu abu mu Mifùndu to.” Mèmè nè: “Kàdi ndi—ndi ngèèla meeji nè mèmè mwà...mwà kuyiisha bu mwanèètù ewu, Ncìvwakù mufwànyineku kweyemena masaluka to. Mvwa mwà kuyiisha ànu Èvànjeeliyò cyanààna,” pàànyì kutùngùnuka.

²⁴ Nè pa nànkù bàvwa nè mukàndà mumfùndila, wà buloba bujimà nè: “Mwanèètù Branham munanga...” ke kuyawù myaba yònsò. Kàdi bàvwa ànu bacyùmvwe bibì. Nènku twètù kubàtùmina mikàbà yà mèyi nè kubàànyishila bwà kuyèlabò bwà kumòna nè ndi...Bàmba nè mvwa “mpiisha muntu awu.” Mèmè—mèmè ncìvwa mupiiishe to. Ncìvwakù mupiiishe mwanèètù nànsha umwe to. Mìngà misangu ndi mwà kupangakana naabò, kàdi aci cidi pa cishìmikidi cyà bulundà.

²⁵ Nè pashiiishe kaaba aka ànu àbìdi àdi panshì aa muntu kampàndà mmufùnde mukàndà pa, muntu ewu, pa nè: *Disùma Dyà Baadèmons*. Dìbà adi mèmè kudyàmbidila nè ncifwànyine kwikala cikondo, pàmwàpa, cyà kufuta, anyì bwà kumumanyisha. Nènku muntu wàkafùnda mukàndà awu ùvwa mudyùle mutangadiki yònsò mu budimi bwà bwambi pa kuumusha mèmè, nènku yèyè ùvwa musòmbè ànu mu disangisha dyànyì mene, ke mèmè kwamba nè: “Ndi ngàànyisha, kî ndidyùla to, kàdi,” mèmè nè, “mwanèètù awu, bwà kwamba mùdi bwalu, wàkacitwa makùmbù mu cibèjibeji cyà *Christian Digest*, ùvwa mwambe nè mèmè mvwa umwe uvwa kacya kàyi

mwangàtekù milàmbù to, nè kusèngeleela bantu bwà mfrangà, nè bikwàbò byà mùshindù awu, nè yèyè wàkacyànyisha.” Kàdi muntu awu musòmbe mwaba awu’s. Kàdi mpùngà wùmvwà mumanyè nè muntu awu ùvwa mwambè cintu kampàndà bwà Mwanèètù Allen civwà kaciyi cijaalàme to.

Yèyè nè: “A. A. Allen nguvwa mufunde mukàndà ewu wà *Disùmà Dyà Baadémons*.”

²⁶ Mpindyewu, A. A. Allen kàtu mufundekù mukàndà awu to. Mémè mvwa mumanyè mufundi wa mukàndà awu. Ke mémè kwamba nè: “Mpindyewu, muntu udi mufunde bwalu ebu awu yèyè kàyì nè meeji matòoke makumbàne bwà kupàtuka nè kukenketa bwà kumòna nè nganyì udi muwùfunde kumpàlà kwà kudyùlayè Mwanèètù Allen, ndi bu ndi ngèèla meeji nè bìmwe byà ku bikwàbò bìdiye ùdyùla naabì bàna bèètù aba abi kí mmu byòbì to.” Nwamònu anyi? Kàdi muntu awu pènde musómbe ànu mwaba awu uvwa mutwè ku cyànyì. Kàdi bìvwa ànu bwà kumumanyisha nè civwàye mwàmbè aci civwa cyà mashimi, nudi numòna’s, bwà nè Mwanèètù Allen kí mmufundekù mukàndà awu to, difundà dyà *Disùmà Dyà Baadémons*.

²⁷ Mpindyewu, mu dyandamuna dyà ku nkonko eyi, nku dyànyì pàànyì dimanya dyà ditàmbe bwímpè. Nènku bu... Nènteetè bwà kuyàndamwina ku Mifundu.

²⁸ Mpindyewu, lwà kumpàlà lùdi lùsanganyiibwa, ngèèla meeji, mu Kolintò wa Kumpàlà, nshapità wa 7 ku mvensà wa 15. Nànku mpindyewu netùteetè bwà kuya ku Mufundu awu bwà kumòna cìdìwu, nè kumòna ní tudikù mwà kwambulwisha muntu wa mushinga mukolè udi wela lukonko elu ewu. Mpindyewu. Kolintò wa Kumpàlà, nshapità wa 7, mvensà wa 15. Nènku ndi ngèèla meeji nè muntu awu ùdi kaaba aka patùdi twakula apa. Mpindyewu mùshindù wùdìWu ùbadiibwa ngwòwò ewu:

Kàdi udi kàyì musèdiibwe yèyè muyè, mulekèle àye. Mwanèètù wa balùme anyi wa bakàji kèna muswikùibwe ku bwalu bwà mùshindù awu to, kàdi Nzambi mmutùbùikile ku ditalala.

169. Mpindyewu. Kolintò wa Kumpàlà, nshapità wa 7, mvensà wa 15. Mpindyewu lukonko lùdìbò béle lùdì nè: **Mwanèètù Branham, eci cìdi cyùmvwija nè mwanèètù wa bakàji anyi wa balùme mmudiikàdile bwà kusèla anyi kusèdiibwa cyàkàbìdi anyi? To.**

²⁹ Nwamònu’s, kwèna umvwa lukonko lwèndè mwaba awu nè cìdiye wàmba aci to. Kí mbadiikàdile to. Nwamònu’s, aci ncifwànyine kwenza dibèngangana dyà mèyì mu Mifundu, kàdi pàànyì Mifundu kayèna yìbèngangana yòyì miinè to nànsha kakesè. Nwamònu anyi? Mpindyewu, twànjààyibì... Nudi numòna’s, bu munùdi mwà kufikisha Mufundu (ànu ku dibala mvensà umwèpelè cyanààna) ku dyambà cintu kanà

cyònsò cyùdi muswè kwamba aci, bwà kukùmbanangana nè meeji èbè. Kàdi bikèngela wàngatè meeji àdìbo bààkula awu.

³⁰ Byenze ànu bu—bu nè mvwa nyiikila nè Mwanèètù Neville kàdi wèwè—kàdi wèwè kungumvwa ngamba mwàkù wà nè: “mboodi.” [‘board’ mu anglais—Muf.]

³¹ Nè dībà adi wèwè mufwànyine kuya, mufwànyine kwamba nè: “Nudi bamanyè cidiye wàkula aci anyi? Tuvwa bamutondèshe dilòlò edi.” [‘bored’ mu anglais—Muf.] Nwamònu anyi? “To,” mùdi muntu mukwàbò mmufwànyine kwamba: “kabyèna nànkù to, bìvwà byùmvwija nè yèyè—yèyè ùvwa nè dibànzà, ùvwa nè cyà kudifuta.” [‘board bill’—Muf.] Mukwàbò wamba nè: “Kaa, to, kàvwa muswè kwamba nànkù to, ùvwa muswè kwamba dibaya dyà ku luseke kwà nzùbu aku.” [‘board’ mu anglais—Muf.] Nè mukwàbò muntu kwamba nè: “To, nnwambilè mùdi bwalu anyi, ndi ngèèla meeji nè ùvwa ùteeta kwakula bwà kutùbula disòsò.” [‘boring’ mu anglais—Muf.] Nwamònu anyi? Nwamònu anyi?

³² Bikèngela ùjandulè muyiiki awu, dībà adi udi umanya cyùdi wamba aci, bwalu mwab’ewu Pòlò misangu mikwàbò ùdi wàndamuna ku lukonko lwàbò.

³³ Míngà misangu bàtu bàmba nè: “Bible ùdi Yèyè mwinè wamba maalu àbèngangana.” Mémè ndi muswè kucijandula. Kì ncyòci to. Ndi—ndi nè bidimu makùmi àsàtù nè bibìdi paanyimà pàa cyambilu apa, kacya ncitu mwànji kumònakù dibèngangana dyà mèyi to. Nwamònu anyi? Kèna ùbèngangana nè Yèyè mwinè to! Ùdi nànkù... Ngwèwè udi ubèngangana Nendè, wamònu’s, kàdi kùyì uMumvwa to. Nyumà Mwimpè m’Mubuuludi, Mubuuludi wa Dìyì. Ki bwà cinyi, dibèngangana dyà ku mèyi... .

³⁴ Nwamònu’s, Pòlò ùdi ùfùndila bantu abu, wamba nè: “Nuvwa bakonke cintu *kampàndà*.” Yèyè, nkààyendè, kèna ànu wamba nè nudi bacikonke to, yèyè ùdi ànu wamba cyòci aci. Pashìishe ke yèyè ewu ùkùdimuka nè ùbàndamuna, cidi cìbèngangana nè cidìbo bakonke aci.

³⁵ Bàvwa bàkonke nè: “Tudi twenza *cikampàndà*, nè *cikansanga*, nè *cikankèngà*.” Kàdi Pòlò ùkùdimuka wamba cintu kampàndà cikwàbò, nwamònu’s, bìmweneka bu nè ndibèngangana dyà ku mèyi. Kabyèna nànkù to. Bu nwènù ànu mwà kubala mvensà mujimà awu, nshapità mujimà awu, nudi bafwànyine kujandula nè yèyè ùdi—yèyè ùdi ùteeta kuumvwija cidìbo bamufùndile aci.

³⁶ Mpindyewu, ànu mwab’ewu aci’s ncifwànyine kumweka bu nè cidi cìfila... .Nènku mùshindù awu ke wùdi upeta dibèngangana dyà mèyi mu Bible, kàdi kabyèna nànkù to. Mpindyewu, bìdi bìmweka bu nè, kaaba aka, muntu ewu mmuswè kumanya, anyi lukonko ludiye cyà bushùwà muswè kumanya:

Mwanèètù wa balùme anyi wa bakàjì mu Mukalenge, udi mwà kusèdiibwa anyi kusela cyàkàbìdì nè kwikala mudiikàdìle, bu yèyè mulekèle mwena dyèndè awu bwà kusela anyi kusèdiibwa cyàkàbìdì anyi? To.

37 Mpindyewu twàngatàayi, tùbangilàayi ku mvensà wa 10:

...kùdì bàdì basèlàngàne ndi ntùma dīyī, kī mmémè to, kàdì Mukalenge: (Nwamònu anyi?) Mukàjì kùùmukì kùdì bàyèndè to, (Nwamònu anyi?)

Kàdì...yèyè muumùke muye, àshaalè kàyì musèdiibwe to, anyi àkapungishàngàne nè bàyèndè: kàdì mulùme kùipaci mukàjèndè to. (Kì Mèyì matùma à Mukalenge ngòwò awu, nwamònu's.)

Kàdì bwà bakwàbò ndi ngàakula, kī m'Mukalenge to: (Nwamònu anyi?) Mwanèètù yèyè nè mukàjì udi kàyì wìtabuuja,...

38 Mpindyewu tàngilàayi cyena-bwalu cyèndè, nwamònu's. Nènkù nwènù tùngunukàayi nè kubala cyòcì eci, mu nshapìtà mujimà amu, nudi nusangana nè bààkadyàmbidila nè: "Twètù basèle mukàjì kàdì kàyì mwikàle...tudi... Nkaavwa musèlàngàne nè mèmè kulwa mwena kwitabuuja, kàdì mukàjàànyì kàvwa mwena kwitabuuja to, ndekèlaayi mwmwipàtè." Kaa, to, kī ng'aci to, kwèna mwà kwenza nànkù to, nwamònu's. Nwamònu anyi?

...Pùikalàku mwanèètù kampàndà mwikàle nè mukàjì udi kàyì wìtabuuja, kàdì mwikàle nè disànkà dyà kusòmba nè mulùme ewu, kàmwipàciku to. (Acì's, kī mbwà bwalu bwà dibàkà to, aci mbwà bupidyà. Kī mbwà "kusèlulula" cyàkàbìdì to. Nwamònu's, shààla nendè!)

Nènkù bu mukàjì udi mwikàle nè mulùme udi kàyì wìtabuuja, nènkù yèyè ùsànkà bwà kusòmba nendè, mukàjì awu kàmubèngikù to. (Ncyà bushùwà! Nwamònu anyi?)

Bwalu mulùme mwena bupidyà mmujidiibwe kùdì mukàjèndè, nè mukàjì mwena bupidyà mmujidiibwe kùdì mulùme: cyanààrà bàrà bèènu balela bàvwa babùpe; kàdì mpindyewu mbàà cijila.

Kàdì mwena bupidyà yèyè muumùke muye, mulekèlaayi àye.

39 Mpindyewu, mwena bupidyà yèyè wàmba nè: "Ncyàkusòmba neebè kàbìdì to, ukàadi mushàale mwena Kilistò." Bwà...Muntu ùdì wàmabila mukàjèndè nè: "Bwalu udi musùngidiibwe, nè neùpatukè mu maalu a pa buloba mwaba wutùvwà musangu kampàndà awu, mèmè nènkushiyè." Mpindyewu, kakwèna cintu nànsha címwè cyùdì mwà kwenza pa bwalu abu to, mulekèle àye. Nwamònu anyi?

40 Anyi mukàji wàmbila bàyendè nè: “Ncyàkudisangisha nè musùmbà wà bansantu babùnguluki bàà mu malaba awu to. Ncyàkwenza eci to! Néntapulukè nè nkushiyè.” Kùùmukukù mu èkèleeziyà to, mulekèlè àyè. Nwamònu anyi?

41 Mwanèètù wa balùme anyi wa bakàji kèna muswikìibwe mu bwalu bwà mùshindù awu to, mbwena kwamba nè, mwena dyèbè yèyè ùkusàka kule nè muswè kuyà bwà Bwalu abu. Kabyèna bikèngela ànu bwà wèwè kushààla mulamàte kùdiye to. Yèyè muswè kukushiya nè yèyè ùkushiye bwà bwalu bwà Kilistò, mulekèlè àkushiye. Kàdi kwèna mwà kusèlulula to! “Kàdi Nzambi’s mmutùbìikile ku ditalala.” Nwamònu anyi? Mpindyewu, kí nnè udi mwà kusèlulula kàbìdi to, yèyè ùkaadi mumanè kwamba nànkù, kàdi kabyèna bikèngela bwà wèwè kusòmba nè mulùme mwena bupidyà anyi mukàji mwena bupidyà piikalàye kàyi muswè to.

42 Yèyè muswè, wàmba nè: “Mpindyewu, wèwè ndààkù mu èkèleeziyà, wèwè muswè kuya kuntwaku, abu’s mbwalu bwèbè. Wèwè muswè kuya ku èkèleeziyà webè, ndààku ànu diya. Bwànyi mèmè, ncyèna nCìitabuuja to. Nènku mèmè—mèmè nènkwenzèlè cintu kanà cyònsò, ncyàkukucyàmakana mu njila to, tungunukà,” díbà adi wèwè ùshaalè ànu mwaba awu, kùyi mumanyè nè nsòmbelu webè mujidila awu neàjidilè mwena kwitabuuja awu, neàmufikishè ku diitabuuja. Nwamònu anyi? Nseke yònsò yìbìdi, mulùme anyi mukàji, nwamònu’s. Wèwè. . .

43 Kàdi mpindyewu ànu bwà kwamba nè: “Mèmè, Mwanèètù Branham, ndi musèlàngàne nè mukàjàànyi mmwena bupidyà, kàdi ke mwanèètù wa bakàji kampàndà ewu mwab’ewu ùndi mwà kusela. Ndi mwà kulekela ewu nùnkù nè kusèla wàwa nàka.” Kaa, to! To, nànsha kakesè! Mucipù wèbè wùdiku too nè pàànùtápulula lufù, nènku kakwèna cintu nànsha cimwè cikwàbò pa buloba apa cidi mwà kukwanyishila bwà kusèla mu Bible to, too nè piikalà mwena dyèbè awu mufwè. Ncyà bushùwà. Kabingila kàmwèpelè, kakwèna disèla dyà cyàkàbìdi nànsha òmwè mwaba nànsha wùmwè to nànsha kakesè, pa kuumusha ànu pàdi mwena dyèbè ùfwa. Kwàjiki. Nwamònu anyi?

44 Kwèna mwà kuDìfikisha ku dibènganganaDì nè Dyòdi diinè to. Pa nànkù balàayi ànu mvensà yidi kumpàla nè yidi yilondà ayi, nènku nenùfike ku dyumvwa cidiye wàmba aci. Mpindyewu, eci cidi cyùmvwija apa, kí. . . Mònaayi nè:

Eci cidi cyùmvwijaku nè mwanèètù wa bakàji anyi mwanèètù wa balùme mmudiikàdile bwà kusèlulula anyi kusèdiibwa cyàkàbìdi anyi?

45 To, mukalenge. Nwamònu’s, yèyè wàcyumvwijì dyàmbedi. Nwamònu’s:

. . . kùdi bàdi basèlàngàne ndi ntuma díyi, kí mmèmè mene to, kàdi Mukalenge nè: Mukàji kùùmuku kùdi bàyendè to:

Kàdi mene nànsa yêyè muyè, àshaalè kàyì musèdiibwe to, anyi àpungishanganè nè bàyendè:...
(Nwamònu anyi?)

⁴⁶ Kakùtukù bintu pààbì byà mwena kwitabuuja kanà yònsò ewu mwikàlè ùpungishiibwa bwà kusèlè anyi kusèdiibwa cyàkàbìdì, pàdì mwena dyèndè nè mwoyi to.

Mpindyewu, lukwàbò ndwòlò elu. Lwibìdì lùdì mùshindù ewu:

170. Mmubidi wà mùshindù kaayi wikalà naawù beena lwonji ku dibìikà dyà ku lufù dyà ndekeelu ku Cilumbulwidi Cinènè cyà ku Nkwasa Mutòòke?

⁴⁷ Ngènzàmpèkààtù awu neàbiikè mu dibìikà dyà ku lufù bwà kulumbulwishiibwayè mu mubidi wùmwàye mwenzèlemù mpèkàatù awu. Nwamònu anyi? Nebikèngelè bwà kupìcilayè ku Cilumbulwidi mu dibìikà dyà ku lufù.

⁴⁸ *Dibìikà dyà lufù* kî ndishintakaja to, dìdì “ndyalujulula dyà cìvwà cìyè mu buloba aci.” Pààkabiikà Yesù ku bafwè, Yèyè ùvwà mubidi ànu wùmwèwùmwè wàkapwekà mu buloba awu, Yèyè wàkabiika mu mubidi wà mùshindù wùmwèwùmwè awu. Tudi tubiika mu mubidi wùmwèwùmwè wutùdì tubwelamù naawù awu; ndibìikà dyà ku lufù, kî ndishintakaja to.

⁴⁹ Mpindyewu, Bible ùdì wàmba nè, bwà nè netùlumbulwishiibwè bilondèshìlè mpèkàatù yìvwà myenjìibwe mu mubidi ayi. Nènku, pààbiikà mwena lwonji ku lufù, yèyè neàlumbulwishiibwè mu mubidi wùmwèwùmwè wùdiye mwenzèlemù mpèkàatù awu, cintu cìmwècìmwè aci.

171. “Adàmà wàkamanya mukàjèndè Evà; nè” katwàngaji “wàkiimita, nè wàkalela Kaayinà.” Ndi ngiitabuujà byònsò byùdì ulongesha, kàdi mmunyi mùndiku mufwànyine—mmunyi mùndiku mufwànyine kwandamuna muntu kampàndà udi—udi wamba nè yèyè kî mmwimite difù paanyimà pàà Adàmà mumanè kumumanya, ànu bwà katwangaji kàà nè? “Adàmà wàkamanyangana nè mukàjèndè; nè yèyè wàkiimita, nè wàkalela Kaayinà.”

⁵⁰ Mpindyewu, twètù bakùlumpè tudi bamanyè cìdì wàkamanyangana wùmvwija. Mpindyewu, lukonko lùdì lùtàngila katwàngaji. Mpindyewu, bu nwènù mwà kutàngila, balundà bàányi, nwamònu’s, kanwèna—kanwèna ànu mwà kufikisha Bible ku dyamba cintu kampàndà pa kaaba kàmwè nè cintu kampàndà cikwàbò. Bikèngela cyàmbè cintu cìmwècìmwè aci dībà dyònsò. Kàdi wèwè muMusangàne wàmba cintu kampàndà apa nè cintu kampàndà cikwàbò lwà apa nùnkù, dībà adi dyumvwija dyèbè ndyà ndibì. Nwamònu anyi? Kwèna mwà kucyènzà to. Kwèna mwà kusangana Evà museeswisha kùdì nyòka nè pashìishe kumusangana mwaba kampàndà mukwàbò museeswisha kàbìdì to. Nwamònu anyi? Kàdi musangu wà

kumpàlà wàkaseeswishiiwbàye mpààkiimitàye apu. Kanwèna mwà kwamba nè mmuseeswishiiwbwa misangu yìbìdì nànsha.

⁵¹ Ndekèlaayi ànu nnùleejile ku tutwàngaji twènù atu. Mu dibala dyà Bible nudi nè cyà kumanya kùyaayà tutwàngaji twènù atu's. *Kàtwàngaji* kàdi kàswikakaja cyambilu cyèbè aci pàmwè. Nwamònu anyi? Mpindyewu tàngilàayi eci. Mpindyewu, mu Genèsè 1.26, tàngilàayi kàtwàngaji aka, nè pashiishe wèwè kuumvwija cyòci eci nè pashiishe nènnwàmbilè mùdiye... pààkamanyanganà Adàmà nè mukàjèndè. Genèsè, nshapità 1, nènku kubangila ku mvensà wa 26. Mpindyewu, tèelejàayi nè ntèmà. Nzambi ùkaadi mwenzè bufùki Bwèndè mpindyewu, nè Nzambi wàkalekela buloba bùpàtula bintu bìdì bìlamba panshi nè bintu byònsò byàkapàtulà buloba abi. Mpindyewu, mu nshapità wa 26... mvensà wa 26 wa nshapità 1 wa Genèsè:

Ke Nzambi kwambaYè nè: Twènzàayi muntu mu cimfwànyì cyètù twètù biinè, bilondèshile difwàngana dyètù twètù—twètù biine: . . . bàlekèlaayi (muntu) . . . (kì nyèyè to; “bòbò,” nwamònu's, ku búngì) bìikalè nè bukòòkeshi pa mishipa yà mu mbù, nè pa nyuunyi yà muulu, nè pa bimunà, nè pa . . . (Nwamònu nè “nè, nè, nè,” biswikakana pàmwè's?) . . . pa buloba, nè pa cintu cyònsò cìdì cìlamba panshi pa buloba.

Ke Nzambi kufùka muntu mu cimfwànyì cyèndè yèyè mwìnè, mu cimfwànyì cyà Nzambi ke mwàkamufùkàye; wàkabàfùka mulùme nè mukàjì (bùbìdì bwàbò mulùme nè mukàjì).

Ke Nzambi kubàbènesha (paanyimà pàà bufùki Bwèndè, dībà adi) nè . . . kubàmbila nè: Nùlelanganè, nè (nè) nuvulanganè, nè nùujè buloba, nè nubùkòòkèshè: . . .

⁵² Katwàngaji paanyimà pàà katwàngaji kàà cìdì . . . Bikèngela bwà muntu ìkalè ùvulangana. Nè, paanyimà pàà kuvulangana, pashiishe kukòòkeshi buloba; aci's ncibwele bulubì nè mu Bukalenge bwà bidimu cinunu. Nwamònu anyi? Èyo: “Kukòòkeshi buloba.” Èyo:

. . . nè ìkalè nè bukòòkeshi pa mishipa yà mu mbù, nè . . . pa nyuunyi yà muulu, nè pa cintu nè cintu cyònsò cìdì nè mwoyi cìdì cìnyungakanà pa buloba.

⁵³ Mpindyewu, Nzambi wàkafùka muntu mu cimfwànyì Cyèndè Yèyè mwìnè, wàkamufùkà, numulekèle, muntu awu, ìkalè nè bukòòkeshi pa buloba bònsò, àbùkòòkèshè nè bikwàbò byònsò, nè ènzè nùnkù nè ìkalè nè bukòòkeshi pa mishipa yà . . . nè cintu cyònsò cyàkenzàYe aci. Nè pashiishe tudi tusangana nè, mu Genèsè 2.7 . . . Tèelejàayi eci. Paanyimà pàà Nzambi mumanè kwenza buloba, mumanè kufùka muntu, mumanè kumupèèsha bukòòkeshi pa buloba, mumanè kumupèèsha cintu cyònsò civwàye naaci aci, ke Nzambi kubàfùka, kubàmbila bwà

kuvulan- . . . bwà kuvulangana nè kuuja buloba, nè bintu byònsò ebi, nè paanyimà pàà mvensà mikwàbò mwandamutekète yà bintu bìvwàYe mujikije, nè maulu nè buloba nè bikwàbò byònsò, “Nè Mukalenge Nzambi kwenza mulùme ku lupwishi lwà buloba.” “Nè!” S’ki Yèyè ewu (Nè, katwàngaji.) wènta muntu udiYè mumanè kwenza. Nwamònu anyi? Wènta muntu:

Nè (ùswikakaja cyambilu Cyèndè pàmwè) Nzambi wàkenzela muntu ku lupwishi lwà buloba, nè kupùùdijayè (mweyelu) mu mimpèmpè yèndè mweyelu wà mwoyi; ke muntu awu kulwayè musùukà wùdi nè mwoyi.

⁵⁴ Mpindyewu, anji elàayibi meeji ku bwalu abu’s! Paanyimà pàà Yèyè mumanè kwenza mulùme, bakàji nè balùme, mu Genèsè 1.26 too nè ku 28, Wàkenza muntu mu cimfwànyì Cyèndè Yèyè mwinè, kumufùka nè kumupèèsha, kumutèèkela mamfùmù mu bukòokeshi bwèndè, nè kumupèèsha makolè ónsò aa nè bikwàbò byònsò, kàdi nànsha nànkù Yèyè kàvwakù mwanji kufùka muntu to.

⁵⁵ Nwamònu’s, Sàtaanà ùkaavwa mumanè kuseeswisha Evà. Mu bushùwà bwà bwalu, Adàmà wàkamumanya, kàdi mukàji ùkaavwa mumana kuseeswisha. Bwalu lwà paanyimà apa mene yèyè . . . pàvwàbò . . . kumpàlà kwà kulwàbò . . . Pàdìbò bàbwela mu cilumbulwidi, kwambaYè nè . . . Ke Nzambi kubàngisha pàmwè nè kwamba nè: “Nganyì udi mwenze eci?” Kubèèla lukonko.

Adàmà kwambayè nè: “Mukàji Ûdi mumpèèshe.”

Ke mukàji kwambayè nè: “Nyòka ngudi munseeswishè.”

⁵⁶ Kàdi Nzambi wàkabèèla mulawu, nè byònsò byà mùshindù awu. Nè *pashiishe* Adàmà kumanyangana nè mukàjèndè, nwamònu’s, paanyimà pàà yèyè mumanè kuseeswishibwa nè mulwè maamù. Ànu byà mwomùmwe nè mwàkenza Nzambi muntu kale wàwa mu Genèsè 1.26 kàdi nànsha nànkù kàvwa ànu mwànji kwenjiibwa to. Nwamònu anyi? Eyo.

⁵⁷ Mpindyewu tàngilàayi, tùpwekàayi kwínshì eku bwà tùbalè kàbidi:

Ke Adàmà kubiikilayè mukàjèndè nè . . . Evà; bwalu yèyè ùvwa mamwèndè wa bintu byònsò bìdi nè mwoyi, byònsò . . . anyi mamwèndè wa byònsò bìdi nè mwoyi. Kubiikilayè mukàjèndè . . . kubiikilayè mukàji awu nè mukàjèndè bwalu yèyè ùvwa . . . anyi mukàji bwalu yèyè ùvwa . . . wa bintu byònsò bìdi nè mwoyi.

Ke MUKALENGE kenzela Adàmà kàbidi nè mukàjèndè . . . bilàmbà byà cisèba bwà kubàbwikila.

⁵⁸ Mpindyewu, mpindyewu mònaayi kàbidi mu Genèsè, 1.21, Nzambi wàkafùka mishipa yà bàlenà mu mbù. Wàkenza bintu byònsò, nè wàkenza bufùki, wàkenza muntu mu

cimfwànyì Cyèndè Sungasunga. Wàkenza muntu, kàyì muntu “kampàndà” to, muntu mujimà, bònso bwàbò mu cimfwànyì Cyèndè Sungasunga. Nwamònu anyi? Nènku Yèyè kubàfùka bilondèshile cimfwànyì cyà Nzambi; mulùme nè mukàjì, wàkamufùka bùbìdì bwàbò mùshindù awu.

⁵⁹ Nènku mpindyewu tudi tujandula, kaaba aka cyàkàbìdì, paanyimà pàà Yèyè mumanè kwenza muntu mu cimfwànyì Cyèndè Sungasunga, paanyimà pàà Yèyè mumanè kumufùka mwaba awu mulùme nè mukàjì, ke Yèyè ewu wènzela muntu ku lupwishi lwà buloba.

⁶⁰ Nè pashiishe, paanyimà pàà Yèyè mumanè kwenza nànkù, paanyimà pàà Yèyè mumanè kumwenza mulùme nè mukàjì, pashiishe n'Yèyè ewu wàlukila apa nè ùmwenzela mukàjì, paanyimà pàà Yèyè mumanè kumwenza. Nwamònu anyi?

⁶¹ Nwamònu's, katwàngaji kèènú aku kàdi kàswikakaja cyambilu aci pàmwè. Ànu byà mwomùmwe nè mwàkambàbo, mpindyewu, *kaaba aka* nè: “Nzambi wàkafùka muntu mu cimfwànyì Cyèndè Yèyè mwinè, bilondèshile cìfwànyikijilu Cyèndè Yèyè wàkamufùka,” Nzambi ngudi wakula mu meeji Èndè, mu mutù Wèndè, cìvwàYe naaci. *S'ki* mwaba wùvwàYe bulelèlè mwenzèle cyenzedi ewu.

⁶² Yesù ùvwa Mwànà wa mùkòòkò mushebeya kacya ku difùkà dyà dyulu nè buloba; Kààkashebeyiibwa munda mwà bidimu binunu binaayi paanyimà to. Nwamònu anyi?

⁶³ Pa nànkù nyòka wàkaseeswisha Evà. Aci's ncyà bushùwà. Pashiishe paanyimà pàà cilumbulwidi cimanè kutèekiibwa, dìbà adi ke Adàmà kumanyangana nè mukàjèndè. Ke pashiishe kwimitayè nè kulelayè mwànà wa balùme, Kaayinà. Nwacyùmvù anyi? Nwamònu's, katwàngaji aku kàdi ànu kàtwàla cyàkenzà Adàmà aci, kí ncìvwà cyenzèke kumpàlà kwà Adàmà to.

⁶⁴ Nènku tàngilàayi kunweku, panwikala baswè kutùngunuka naaci, mu dīyì dinène adi mwaba ewu, ngèèla meeji nè tudi tucisangana kaaba aka mu... nè mu nshapità mwi4 emu, ndi ngèèla meeji nè mmwòmò.

Nè Adàmà kumanyayè... mukàjèndè; nè yèyè wàkiimita, nè wàkalèla Kaayinà, nè (katwàngaji) wàkamba nè: Ndi mupetèle muntu kùdi MUKALENGE.

⁶⁵ Dìbà adi mu bushùwà bwà bwalu kàvwa Adàmà to, ùvwa m'mwànà wa Nzambi ku cyòcì aci. Nwamònu anyi? Nwamònu anyi? Nwènú baswè kutèeka katwangaji kèènú mwaba awu, nwamònu's (“nè” cyàkàbìdì): “Ndi mupetèle muntu kùdi Nzambi.” Pashiishe kwamba nè Nzambi wàkamupèèsha cintu cyà disungulujangana cìdì cìbìikidiibwa nè Kaayinà aci. Nkwepi kùdi kufùmine bukooya bwònsò nè manyaanù nè bikwàbò byàkadì naabi Kaayinà abi, mbifùmine kùdi Nzambi anyi? Kabyèna mwà kwikala nànkù to! Nwamònu anyi?

Wakaseeswishiiibwa kùdî nyòka, nè nyòka...yêyè ùkaavwa mumana kwimita. Dîbà adi Adàmà kumanyanganyè nendè, ncyà bushùwà nè yêyè wàkenza nànkù, wàkaya kashààla nendè bu mukàjèndè, kàdî yêyè ùkaavwa mwimite difu dyà mwànà awu.

⁶⁶ Nè pashiishe pààkalediibwa mwànà wa Adàmà awu ndekeelu wa byònsò, ùvwa muntu wa kalolo, mupòle maalù, mudìpwekèshe, mupòle bu Adàmà.

⁶⁷ Kàdî mulùmyànà ewu, nkwepi kùvwà mashimi meenà diìnà awu, nkwepi kùvwà mpèkaatù awu mufùmine? Nkwepi kùvwà mulùmyànà ewu, Kaayinà, mushebeyanganyi awu? Nè Bible mmwàmbè nè “Dyabùlù mmushebeyanganyi.” Mashimi awu mmáfùmine penyi? (Dyabùlù’s n’taatù wa mashimi; mmwena mashimi nè taatù wa mashimi.) Àvwa nè cyà kufùmina ku mushimi kampàndà wà pambèlù pa Nzambì. Pa nànkù Kaayinà ùvwa mubi awu, nè tatwèndè ùvwa Sàtaanà; ke kulelayè mubi ewu.

Nè pashiishe, mu bushùwà bwà bwalu, Adàmà wàkamanyangana nè mukàjèndè, cyà bushùwà.

⁶⁸ Nènku, èyo, pàmwàpa bu wèwè mwàmbè mùshindù ewu. Ndi mufwànyine kwamba nè, ndyàngata mèmè mwine, èè, mpindyewu, Rebekah wàkalediibwa, nè paanyimà paa katanci kulwàkù... .

⁶⁹ Mwawa mbala bwalu-bulonda bwà Yòzefù dîngà ditùkù, nènku mwawa nè disànkà dyàbùngì ku bwalu-bulonda bwà Yòzefù. Mèmè kubànda mu kazùbù kakesè kàà cisokomenu nè kutwà binù panshi, lwà mu Minneapolis mwàmwà, ke mèmè kwamba nè: “Mukalenge Nzambì, mùshindù mwine wùndì nKusàkidila bwà muntu bu Yòzefù’s wè!” Ke mèmè kudyàmbidila nè: “Bu mèmè... Mèmè kujinga nè mwawa kwikala mwinyike Billy Paul nè: ‘Joseph,’ bwà muntu munène wa luumù awu.” Kakwèna cimanyinu nànsa cìmwè cìdì cìmubanda mwaba nànsa wùmwè mu Bible to, cìfwànyikijilu cipwàngànè cyà Kilistò mu mùshindù wònsò. Mèmè kudyàmbidila nè: “Mùshindù mwine wùndì mufwànyine kunanga...” Mèmè kwamba nè: “Kaa, bu nè mwawa nè mwànà wa balùme, mwawa mwà kumwinyika ‘Joseph.’”

⁷⁰ Nènku ànu pa dîbà adi Bukènkè abu kubwelabù mu nzùbu amu nè kwamba nè: “Neùpete mwànà wa balùme nè neùmwinikè dînà nè ‘Joseph.’”

⁷¹ Mèmè kumanyangana nè mukàjàànyì, bushùwà, yêyè kulela Sarah. Pashiishe mèmè kumanyangana nè mukàjàànyì nè yêyè kulela Joseph. Nudi bamòne cìndì njinga kwamba aci anyi? Nwamònu’s, kacìvwa nè bwalu nè wa kumpalà awu to. Mulayì wà Nzambì ùvwa “Joseph,” Sarah wàkalwa pankacì pàà cyòcì aci. Nciyì ntèeka Sarah mu lutàtù lukolè lwà mùshindù awu to, kàdî ànu bwà kunùleeja cìndì—cìndì njinga kwamba aci.

Nwamònu's, aci . . . Sarah ùvwa pèndè mutùma kùdì Nzambi. Nè pa nànkù dībà adi tudi tumanya nànkù.

⁷² Mpindyewu, kàdi, nwamònu's. Nzambi, pààkapicishàYe Adàmà nè Evà ku cilumbulwidi, ùkaadi mumanè kwenza mpèkaatù kumpàlà kwà Yèyè kupicila ku cilumbulwidi. Nè, tèèlejàayi, nuvwakù bamanyè nè mwànà wa kumpàlà wakalediibwa pa buloba apa ùvwa “mulediibwe mu mpèkaatù, mufwimba mu bubì, mulwè pa buloba wàmba mashimi anyi”? Wa kumpàlà mene uvwa mulediibwe awu wàkalediibwa mùshindù awu, bwalu . . .

⁷³ Wèwè udi wamba nè: “Kàdi bìshi bwà Adàmà nè Evà?” Kabàvwa balediibwe to. Bàvwa bafùkiibwe. Nwamònu anyi?

⁷⁴ Kàdi mwànà wa kumpàlà wàkalwa awu wàkalediibwa mu mpèkaatù, pa nànkù bìvwa nè cyà kwikala mùshindù awu. “Muntu udi mulela kùdì mukàji ngwa matùkù makesè menemene nè mûle tètè nè lutàtu.” Mmùlela mu mpèkaatù. Ke bwà cinyi bìdi bikèngela bwà yèyè kulediibwa cyàkàbìdi, nwamònu's, ku Nyumà; kî nku *meeji* à nyumà to; ku Dilediibwa dyà mu nyumà, nwamònu's, didi òmufùkulula, òmuvwija cìfùkiibwà cìpyacìpyà. Muntu wa kumpàlà wàkalediibwa awu wàkalediibwa mu mpèkaatù.

⁷⁵ Dībà adi, bìvwa bìkèngela bwà kulwakù Kampàndà kakùyì ku disangila dyà mulùme nè mukàji to. Mpindyewu, pìikalàbi nè disangila dyà mulùmè nè mukàji kadìvwa cintu cyà kumpàlà to, dībà adi mbwà cinyi byàkakèngela bwà kwikalabò nè Umwe ku mubidi wa bukàji bwà kupikula bukwàbantu bujimà? Bwà cinyi Yèyè kààkapwekeshakù ànu umwèpelè mu tujila kwamba nè: “Mwakàne nyèyè ewu udi *wela meeji* mîmp”? Cìvwa nè cyà kulwila ku mubidi wà bukàji, cilwila kùdì mukàji, bwalu ke kùvwàci cilwile dyàmbedi. Ku mubidi wà bukàji, kutwàladi bubì; nè ku mubidi wà bukàji, kutwàladi Bwakànè. Nwamònu anyi? Nzambi, kakùyì masandi, kakùyì dijinga dyà disangila dyà mulùme nè mukàji to, wàkatwàla Yesù Kilistò ku diimiciibwà dyà kadiyì katòba, ku dibwikidija dyà Màriyà nè difùka munda mwèndè Mwànà ewu; aci cyàkalwila ku mubidi wà bukàji. Nènku, ku cyòci aci, Mashì Èndè à Cijila awu àkapikula cisà cyònsò nkòòng cìvwà cidishinde aci. Nwamònu anyi? Pa nànkù cidi nè cyà kwikala nànkù, kakwèna mûngà mùshindù bwàci cyòci to.

⁷⁶ Muntu yònsò udi mulediibwe kùdì mukàji mmuswikìibwe ku lufù, mmufwè pàdiye mulediibwe apu. Ncyà bushùwà.

⁷⁷ Ke bwà cinyi mvwa ngàakula ditùkù adi mùshindù wutùdì nè ditwishiibwa dibènesha adi mpindyewu.

⁷⁸ Pàvwà Izàlèlèlè . . . Kacyèna . . . Ndi ngàakula bintu bùngì cyanààna bìdi kabìyì nè bwalu nànsha bùmwe to, kàdi misangu mikwàbò Mukalenge ùtu ùmpèesha cintu kampàndà nè cìtu ànu cintùpisha mwoyi nè disànkà. Pa nànkù pààkampèeshàYe

aci, cyàkatumpisha mwoyi bikolè kutàmba ní ncinyi cyònsò cínkààdikù mupetè mu bidimu. PàakacimpèeshàYe aci ditùkù adi, pangàakamòna nè Izàlèèlà, mupika awu, kàvwa nè kwàbò to, bàna bàà Nzambi. Bàbàkùpila dyàmpà dyatùke, cintu kanà cyònsò cidibo baswè aci's! Kaa, bu bóbò ànu mwà kwikala nè kwàbò kùvwàbò mwà kusòmba mu ditalala, kupeta cyàkudya cyàbò ku cikòpàkànyì cyà mu mpàlà mwàbò's wè!

⁷⁹ Nènku, dīngà ditùkù, kulwaku mupròfeta ùpweka ùfùmina mu cipèèlà mwàmwa, mulombola kùdi Dikunji dyà Kapyà, nè kubàmbila bwà buloba bulaya. Muntu nànsha umwe kàvwakù mwànji kufikamù to, kabàvwakù bamanyè kantu nànsha kàmwe pa bwalu abu to. Kàdi's cívwa mulayi. Pa cyòci aci bàakiitabuuja nè bàakalonda mupròfeta ewu too nè pàakafikabo pabwîpi nè buloba bulaya.

⁸⁰ Pashìshe's kùdi ntèmu dyèndè nè *Yoshùwà*, cidi cyùmvwija nè “Yèhowàh-musungidi,” wàkasabuka Yadènà kubwela mu buloba abu, nè kwalukila nè cileeji cyà nè buloba abu bùvwa ànu menemene cyàkambà mupròfeta awu nè bùvwa ku Diyì dyà Nzambi. Bàvwa nè mushiki wà tumuma twà mvinyò, tükèngela bwà bantu bàbìdi bàtwambùlè, nènku bàvwa mwà kulabula mamuma meena diina à mu buloba abu. Muntu nànsha umwe kàvwa mumanyè nè buloba abu bùvwaku to, bàvwa ànu bacitàbùùje. Bàakapàtuka ku diitabuuja nè bàakaciitabuuja.

⁸¹ Mpindyewu pàakapyànàbo buloba bwàbò, mùshindù mwinè wùvwàbo nè disànka's wè! Muntu nè muntu ùvwa mwà kusòmba mu ditalala, kwikala nè budimi bwèndè bukesè, kwikala nè bàna bèndè nè bikwàbò byònsò. Kàdi, nànsha nànkù, ndekeelu wa byònsò bukùlākājì bwàkamupeta, nè lufù kumufinyina panhsi nè kumwangata.

⁸² Pashìshe kutùulukakù mu tujila twà mu Dyulu, kupicila ku mukājì kampàndà, Mulwanganyi mukwàbò munène wa mvità, mutàmbe bunène wa ku bònsò abu, Nzambi Yèyè mwinè mumwènèshìibwe mu mubidi, Yesù Kilistò. Nè kwambilaYè Izàlèèlà mùvwàbo cisàmbà cinène, kàdi lufù kubii manyina, Yèyè kwamba nè: “Kàdi ndi nnwàmbila bwà buloba bukwàbò. Mu Nzùbu wa Taatù Wanyì mùdi bisòmbedi byàbùngì. Bu kabiyi nànkù to nùnkù's Ndi munwàmbile. Nudi nè disànka mu buloba bwènù, nudi nè nzùbu yènù, nudi nè bàna bèènù balela. Kàdi's nudi nujiikangana muntu nè muntu kuntu kwàka nè bimwèka nè ke ndekeelu.”

⁸³ Yobò wàkacimòna, kwambayè nè: “Muci wòwò mufwè, ùdi cyàkàbìdi nè mwoyi. Kàdi muntu ùdi ùdìlonga panhsi nè ùkùùla mwoyi, wépi? Bàna bèndè bàlwalwa kumutwa mushinga kàdi yèyè kàyì ùcimòna to. Kaa, bu Wèwè mwà kunsokoka mu lukità, kundamina mu mwaba musokòme too nè pàapità ciiji Cyèbè cikolè aci's!” Yèyè nè: “Muntu yèyè mufwè neikalè nè mwoyi cyàkàbìdi anyi?”

84 Bidimu binunu binaayi kumpàlà kwà cyôci aci, bàvwa bindile cintu kampàndà dyàmwàmwa dyà lukità alu. Bintu byônsò binène byàkabàpèèshà Nzambi abi, nzùbu, dîkù nè bânà, nè èkèleeziyà, nè bikwàbò byônsò, nè baprôfetà, nè bantu banène too nè mu cikondo eci, kàdi nànsha nànkù muntu nè muntu wàkafwà nè wàkaya ku lukità lwèndè. Kàdi ke Kampàndà ulwàlwa ewu wàmba nè: “Mu Nzùbu wa Taatù Wanyì mùdi bisòmbedi byàbûngì, nè Mémè nénye kanùlongolwela kaaba.” Bu Yoshùwà, Wàkatwilangana nè Wèndè Kaadèsà-baanèa.

85 Pàakalwà Izàlèlèl à ku Kaadèsà-baanèa. . . Ne Kaadèsà ùvwa nkwaswa wa cilumbulwidi wa buloba bujimà mu ciinè cikondo aci, tusùlù mwandamutekète tùumukila ku musùlù munène, byùmvwija cilumbulwidi, bu mùdi Nzùbu wa Nzambi nè Èkèleeziyà yìdì yipàtukaMù ayi. Nènku Yoshùwà, kuumukila ku Kaadèsà-baanèa, wàkasabuka kuya mu buloba bulaya bwà kutwàla cileejì.

86 Mpindyewu, Yesù wàkatuutakeena nè Kèndè *Kaadèsà*. Cìvwa ncinyi? Nkwasa wa cilumbulwidi! Cìvwa mpenyi? Ku Kàlvariyo, kwàkaMulumbulwishilà Nzambi bwà mpèkaatù yà bàà pa buloba. Bàakenza cinyi? Yèyè kutwilangana nè lufù, difutu dyà Nzambi. Bwà kupungisha bangènzàmpèkàatù nè Nzambi, Yèyè wàkafwà lufù nè wàkasabuka musùlù wà Yadènè (wà lufù). BàakaMujiika.

87 Wàkafwà mu mùshindù wà nè ngondo nè mítootò byàkadyùmvwa bundù. Wàkafwà mu mùshindù wà nè buloba bwàkasaama disaamà dyà mutù. Bwàkanyùkushiibwa mu mùshindù wà nè mbwebwe yàkabùnguluka ku mikùnà. Bwàkanyùkushiibwa mu mùshindù wà nè mitòoto kayivwa mwà kukenka to, ngondo kàvwa mwà kukenka to, dībà dyà muulu kujima munkàcinkaci mwà ditùkù. Wàkafwà! Mufwè mu mùshindù wà nè mwena Loomò kampàndà wàkangata difumà dyà bujitu bwà kilò yinaayi nè citùpà nè kuMucimpikadi dyônsò nkòong mu mwoyi Wèndè; mâyì nè Mashi. Ùvwa mufwè! Wàkasabuka Yadènè. Nènku kuMwelabò mu lukità nè kubùngulujakù di—dibwe, kukèngelabi bantu lukàmà lujimà bwà kucyènza. Yèyè ùvwa mufwè's! Kutèèkakù citampì cyà beena Loomò.

88 Kàdi mu dindà dyà Paasàkà Yèyè wàkaalukila ùfùmina dyàmwàmwa dyà Yadènè, nè wàkamba nè: “Ndi Ewu uvwa mufwè; nè udi cyàkàbìdì nè mwoyi bwà kashidi nè kashidi!”

Bàmwè bàà kùdibo bàakamba nè: “Tudi tumòna nyumà kampàndà.”

89 Yèyè nè: “Ndengàayi. Nyumà ùtu nè misunya nè mifùbà mùNdì naabì emu anyi?” Yèyè nè: “Nudikù nè cintu kampàndà cyà kudyà anyi? Ntwàdilaayiku cintu kampàndà.” Ke kuMupèèshabò mushipa nè dyàmpà. Ke Yèyè kubìdya. Ùvwa m'Muntu's!

⁹⁰ Yèyè ùvwa cinyi? Wàluja cileeeji cyà nè kùdi Buloba butùdi tuyakù. CyàkenzàYe ncinyi? Yèyè, bu Yoshùwà, Wàkatwàla cileeeji cyàBù. Yèyè nè: “Mpindyewu, wèwè muswè cileeeji CyàBù nè: ‘Nyingàlalaayi, muntu nè muntu wa kunùdì, nè bàtìijibwàyi mu Dìna dyà Yesù Kilistò bwà dilekelediibwa dyà mpèkaatù, nènku nenùpetè Nyumà Mwimpè.’ Ke cileeeji cyàkaMbiisha ku lufù aci. Nènnùpèèshè Cyeyà cyà bumpyànyi bwènù.” Nè pashìishe cyàkenzèkà ncinyi? Mu Ditùkù dyà Mpenta Nyumà Mwimpè wàkalwa pa mwena kwitabuuja.

⁹¹ Mpindyewu citùdi twenza ncinyi? Biikàle tutonda mpèkaatù yètù, tudibala twètù biinè bu bafwè, bajiikiibwe Nendè mu dibàtiiza, babiishiibwe Nendè ku lufù mu dibìikà Dyèndè dyà ku lufù. Bwà kwenza cinyi? “Kusòmba Nendè mu myaba yà mu Dyulu.” Ke mutùdi dilòlò edi, basòmbè (kí mmu mubidi to) mu nyumà, meeji ètù, ngènyi yètù, misùùkà yètù bìdi dyàmwàmwa dyà ntàtù yà buloba patùdi twakula apa mene. Tudi cinyi? “Mu myaba yà mu Dyulu *mu* Kilistò Yesù.” Mmunyi mutùdi tubwelaMù? “Ku Nyumà umwèpelè,” Kolintò wa Kumpàlà, nshapità wa 12: “ku Nyumà umwèpelè nkutùdi bònsò babàtìijibwe kùdi Nyumà Mwimpè mu Mubidi wùmwe wà beena kwitabuuja.” Bukalenge busokòmè bwà Nzambi!

⁹² Mwómò amu tudi twela mèsù paanyimà nè tumòna mwaba wutùvwà nè ciibidilu cyà kushima nè kwiba nè kwibila nè kunwa mfwankà nè kwenza bintu bìdi bibì. Tudi babiishiibwe ku cyòci aci. Tudi mu myaba yà mu Dyulu. Ncinyi aci? Cileeeji cyà nè dīngà ditùkù twadyàkupeta mubidi mufwànàngàne nè mubidi Wèndè Yèyè mwinè wà butùmbi awu. Ncileeeji cilelèlè cyà dibìikà dyà ku lufù, bwalu, mu mùshindù mushààdile, tukàadi bamanè kubìishiibwa pàmwe Nendè, mu mùshindù mushààdile tukàadi bamanè kufwà.

⁹³ William Branham uvwa kale wàwa nè mwoyi awu kàcyèna kàbìdì nè mwoyi to, mmufwè kùkaadi bidimu makùmi àsàtù nè byà mu njila, mpindyewu ncifùkiibwà cipyacipyà. Orman Neville uvwa nè mwoyi kale wàwa awu kàcyèna kàbìdì nè mwoyi to, wàkafwà bidimu byàbùngi kumpàlà kwà cyòci aci, eci ncifùkiibwà cipyacipyà. Orman Neville mmufwè, mwendeshi wa—wa kàbalù awu, munayi wa manàyi à mfrangà, anyi cyònsò cyàkadiye aci, muntu uvwa musangu kampàndà nè mwoyi awu’s mmufwè. Ncyèna mumanyè to, Mwanèètù Neville kàvwa nànkù to; kàdi cyònsò cìvwàku aci, yèyè’s mmupiiile ku byònsò abi, “Mupiiile ku kantu katàmbe bukesè mmupiiile ku byònsò.” Cyònsò cyúvwà aci, wèwè udi ngènzàmpèkaatù, ke cyùdi.

⁹⁴ Nènku udi mufwè bwalu udi munangè maalu à pa buloba. Nènku paucidi ànu munangè maalu à pa buloba, nànsha wèwè mujìkùle bìshi nè udi kuulu *eku*, kwèna kuulu eku to, ucidi ànu kwínshì *aku*. “Ewu udi munangè maalu à pa buloba anyi bintu byà pa buloba, dinanga dyà Nzambi kí ndyanji kubwela munda mwèndè to.”

95 Kàdi paùdi ubànda kumutù kwà cyôci aci ku bintu byà mu Dyulu dîbà adi udi utèeka majinga èbè ku bintu byà kuulu, bwalu udi mubiishibwe ku lufù pàmwè nè Kilistò nè basòmbe mpindyewu pàmwè mu myaba yà mu Dyulu. Shààla wèwè ànu mutwishibwe nè, kakwèna cintu nànsha cìmwè cidi mwà kukwenzela bibi to, kantu nànsha kàmwè. Nànsha lufù lwinè kalwèna nè. . . kabyèna mwà kukwenzela cintu nànsha cìmwè to. Wèwè ukàadi mumanè kwela lwongò mu Kilistò. Ditwishibwa, Cyeyà, citùpà cyà kumpàla cyà mushinga ncimana kutwàla, udi muCiitàbe. Cinùvwà bènzè ncinyi? Kubiika Nendè ku lufù mu dibiika dya ku lufù.

96 Ntàngila paanyimà mwaba wùmvwà kale wàwa awu. Mpindyewu ndi kumutù kwà cyôci aci. Bwà cinyi? Ku ngàsà Wendè Yèyè wàkambàdisha, nènku's ki mèmè ewu mpindyewu musòmbe mu myaba yà mu Dyulu mu Kilistò. Kaa, ekelekele! Ki bwalu mbwòbù abu's. Dîbà adi Bible ùdi ùlwa Mukàndà mupyamùpyà. Dîbà adi nudi nuWùbala nè mèsù à nyumà nè luumvu lwà nyumà. Dîbà adi nudi numòna mènà nè mipinganyi, nè pashishe nudi numòna ndungilu ayi. . . nè tutwàngaji, mündi njinga kwamba, nè bikwàbò, mu Bible.

97 Kaa, mwaba wùdiYe wàmba. . . Badi bàmba nè: “Ùdi ùbèngangana ku mēyì Yèyè mwine”; udi ubadila kwínshì *eku*. Bándila kuulu *eku* ùMubalè, Yèyè yònsò mmushilàngàne dîbà adi. Nudi numòna anyi? Ncyà bushùwà. Bushùwà. Bushùwà, Ùdi ùmvwija cintu cipyacipyà ànu menemene paùdi uMubala mu Nyumà. Èyowà.

Lukonko lukwàbò elu mu bushùwà bwà bwalu kí ndukonko to, lùdi lwàmba ànu nè:

172. Mwà musòmbele bidimu byàbùngì mu mpèkaatù too nè pangàakapeta Mukalenge. Bu wèwè mwà kuswà, Mwanèètù Branham, mèmè ewu ndi mwenzè kàbidi mpèkaatù nè ncyèna mukùmbànyine bwà kulwa kumpàla kwèbè mu mwaba wà cijila ewu to. Bu wèwè mwà kuswà ngambilèku ní ndi mwà kwalujuludiibwa cyàkàbidi mu kaabujimà. Bu wèwè mwà kuswà nkwàcishèku, Mwanèètù Branham, ndi nè démon munda mwànyì emu. Nkwàcishèku! Udikù mwà kuntentekela byanza nè kungaalujulula cyàkàbidi anyi?

98 Mpindyewu, kùdi lukonko, ncìwà mulùtàbàlèèle to pàmvwà mucibalè kukàadi katanci. Kùdi lukonko. Mpindyewu, muntu awu yèyè kaaba aka. . . Lekèlaayi ànu nnùbadilèci:

Ndi musòmbe—ndi musòmbe bidimu byàbùngì mu mpèkaatù too nè pangàakapeta Mukalenge. Bu wèwè mwà kuswà, Mwanèètù Branham. . . (Nwamònu anyi?) . . . Ndi mwenzè kàbidi mpèkaatù nè ncyèna mukùmbànyine bwà kulwa kumpàla kwèbè mu mwaba wà cijila ewu

to. Bu wêwè mwà kuswà ngambilèku ní ndi mwà kwalujuludiibwa cyàkàbidi.

⁹⁹ Èyowà's! Kwèna mwenzè mpèkaatù to, mulundà wanyì, kule menemene mu Nzambi byà kùyi mwà kwalujuludiibwa to. Bu wêwè mwenzè mpèkaatù muyè kule mu mùshindù wà kùyi mwà kwalujuludiibwa to, kùvwa mufwànyine *kuswà* bwà wêwè kwalujuludiibwa to. Nwamònu anyi? Nwamònu anyi? Kàdi pàcidìku ànu Cintu kampàndà cikwàta mudimu nè mwoyi wèbè, wêwè ucìdi ànu mu njila wa dyalujuludiibwa.

¹⁰⁰ “Mupìile ku kantu kakesè mmupìile ku byònsò.” Ndi mwenzè mpèkaatù misangu yàbùngì, ditùkù dyònsò edi muntu nè muntu wa kutùdi ùtu wènzà bintu bitùdi katùyi baswè kwenza to.

¹⁰¹ Cidi mu mwoyi wètù. . . Kwèna muswè kwikala mùshindù awu to cyanààna kùvwa mufwànyine kwela lukonko elu to. Nwamònu anyi? Aci cyòci ciine's ncijaadiki cyà nè Nzambi ùcìdi ànu ùkwàta neebè mudimu. Pàmwàpa udi mubìndùlùke, pàmwàpa Sàtaanà ùdi ùkwambila nè kwèna mwà kwalujuludiibwa to. Ùdi ùshima, cyà bushùwà, ùdi ùshima. Bwalu, tàngilàayi, kwòkò kwikàle ndòndò kampàndà, ùbìikila, kùdi nè cyà kwikala Ndòndò bwà kwandamuna ku dibìikila adi. Kwòkò kwikàle nzala yà Cintu kampàndà, bìdi bìkèngela bwà Cintu kampàndà aci ciikalè mwaba kampàndà cyanààna kwènàku mufwànyine kupeta nzala yàCì to. Nwamònu anyi?

¹⁰² Ànu múnkaadi mwambàmbe misangu nè misangu. Bangabanga nè mushipa kwikalawù ne musààlàlè paanyimà, kùvwa nè cyà kwanji kwikala màyi à wòwù kowelamù kabiyi nànkù to kawùvwa mwà kupeta musààlàlè to. Kumpàlà kwà kwikalaku mucì kampàndà bwà kutòlokawù mu buloba, bìvwa bìkèngela kwikalaku buloba dyàmbedi kumpàlà kwà kwikalaku mucì, bwalu bìvwa bìkèngela bwà buloba kwikalakù dyàmbedi bwà mucì kutòlokawù.

¹⁰³ Mpindyewu, kumpàlà kwà kwikalakù bufùki, bìkèngela kwikalè Mufùki bwà kufùka bufùki abu. Nudi bamòne cìndi njinga kwamba aci anyi? Mpindyewu, paucìdi ànu ujinga nè mwikàle nè nzala bwà kwalukila kùdi Nzambi, kùdi Nzambi mwaba kampàndà ùkubìikila, wamònu's, cyanààna kùvwa mufwànyine kwikala nè nzala to. Kùdi Mufùki!

¹⁰⁴ Mpindyewu, wêwè. . . Kùdi mwaba wùdi mwà kusambuka paùdi kùyi mwà kwalukila to, kàdi pàcìdi acikù udi kwìnshì aku kàbidi mu ngiikàdìlù wùvwa usanganyibwa awu. Bìdi bìleeja nè udi ànu *mudishinde* ku ngàsà. Dìtwà dyà cìmpìngà kí *ndijìmina* to. Ndi muswè bwà muntu àngambilèku mwaba wùdi dìtwà dyà cìmpìngà diikàle *dijìmina*, nè ùcìjaadika ku Bible. Muntu mutwè cìmpìngà kí mmujìmine to, yèyè ùdi ànu mupàtùke ku bwòbùmwe cyanààna.

¹⁰⁵ Izàlèlèlè wàkatwà cìmpìngà kàdi kabààkajìmija cipungidi cyàbò to, bàakajìmija butùmbi bwàbò—bwàbò nè disànkà.

¹⁰⁶ Davidi wàkajimija disànkà dyà lupàndù lwèndè pààkangatàye Bathshèbà, mukàjì wa Uliyà, kàdi kàvwakù mujimije lupàndù lwèndè nànsha. Yèyè kààkambakù nè: “Ngaalùjùlwilè lupàndù lwànyì to.” Wàkamba nè: “Ngaalùjùlwilè *disànkà* dyà lupàndù lwànyì.”

¹⁰⁷ Kaa, kùdi bintu búngì cyanààná byà bwena nè ànu mikenji ebi leelù ewu, byà nè “kanùlengi, kanùlabulu.” Kanwèna nwenza bintu bilondèshile mikenji to.

¹⁰⁸ Ncyèna mulwè ku èkèleeziyà ewu dilòlò edi bilondèshile mikenji to. Ndi ndyùmvwa mucyòke, ndi—ndi—ndi mubìndùlùke, ndi mutàcìshìibwe, ndi ndìkonka cintu kampàndà cìdi kumpàlà kwànyì, mwoyi wànyì wùdi wùlàkuka kapyà, mu mùshindù mene wà nè mwoyi wànyì ùdi wùlubakana. Ndi nè tukùlàkàje tunkwàte, bisaamà, ànu patùdi twakula apa mene, bìdi bǐntwa kumpàlà nè paanyimà, muulu nè mwinshì mu *mwab’ewu*. Mucyòke, mubìndùlùke, nkanka; ngààkwàcila *apa* nè ngààvinya; mwikale nè bânà bàà nkàsà bakàmina mu bisàbaatà. Ncivwaku mudyumvwè bwà kupweka *mwab’ewu* to. Ndi mulwè bwà cinyì, dībà adi? Bwalu ndi munangè Nzambì. Nè mwoyi anyì mufwe, ndi nè cyà kwimana kaaba aka Bwèndè. Kì nnè mbwalu ndi mwenzèjìibwe to. Ngenzè anyì mbenge kwenza kabyèna bìMwambila bwalu to. Ndi mufwànyine. . . Bu mèmè mwà kufwà mvwa nya mu Dyulu, nànsha bishi. Kàdi ndi ndwa bwalu ndi muMunangè. Udi ukwàcila Nzambì mudimu bwalu udi muMunangè, kì mbwalu udi ànu mwenzèjìibwe bwà kucyènza to. Mbwalu udi muMunangè bikùmbàne!

¹⁰⁹ Ncyèna nè lulamatu kùdi mukàjàànyì nè mbwalu ndi nè bwòwà bwà nè mmufwànyine kushipa naanyì dibàkà to. Ndi nè lulamatu kùdiye bwalu ndi mumunangè. Kakwèna mukàjì mukwàbò pa bulòba to ànu yèyè. Ke bwà cinyì ndi nè lulamatu kùdiye. Kì mbwalu. . . Mèmè mwenzè cìlèma kampàndà nè kwelabò meeji nè ndi mwenzè cintu kampàndà cìbì, kulwa kùdiye, kwamba nè: “Meda, munanga wanyì, ncivwa nè meeji à kwenza nànkù to.” Yèyè’s mmufwànyine kumfwila luse bwà bwalu abu, ndi mumanyè nè mmufwànyine kucyènza. Ndi mufwànyine kumfwila luse; ndi mumunangè. Kàdi ndi—ndi mufwànyine kumfwila luse; yèyè mmufwànyine kumfwila luse. Kàdi ncyèna mufwànyine kucyènza bwà bwalu nànsha bùmwe to, ndi mumunangè bikolè be bwà kucyènza. Kì nè mbwalu mvwa mwelè meeji nè kàvwa mufwànyine kumfwila luse to, cìdi ànu meeji à nè ndi mumunangè bikolè bwà kucyènza dyàmbedi. Nènku pàndi ànu mumunangè mùshindù awu, ncyàdyàkucyènzakù to; nè yèyè munnangè mùshindù wùdiye nè cyà kunnanga, nànsha yèyè pèndè kààkucyènzakù to.

¹¹⁰ Nè wèwè munangè Mukalenge nè mwoyi wèbè wònsò, kabyèna bikèngela bwà wèwè kuditàcisha bwà bintu ebi to. Wèwè mwenzè cìlèma, kwèna wenza mpèkaatù ku bukolè to, udi mwenzè ànu cintu kampàndà cyà cìbì. Nwamònu’s, udi

muselèùmùke mupinge paanyimà. Bulelèlà, wèwè uvwa kaaba aka mu bwobùmwe, udi mudishinde cyàkàbìdì mu cimvundù mwab'ewu.

¹¹¹ Kàdi ncinyi aci? Mbyenzè ànu bu mùdì mukankù ka—kampàndà. Musangu kampàndà ngàkamòna, lwà mu Lupangu lwà kulamina nyama yà diitu lwà Cincinnati emu, mèmè kwangata Sarah nè mvwa ngènda mpweka kuntwaku... Kòkò cintu kampàndà cínkaadiku mumòne cintàpa ku mwoyi, nkumòna cintu cyela mu nsànji.

¹¹² Ncyèna ànu mwà kutwàla bwà kumòna cintu kampàndà mu nsànji to, nànsha tunyuunyi twà tukesè. Nènku ndi mumanyè nè nwènù bakàji nudi nè tunyuunyi tukesè atu, nudi nutùlekelela.

¹¹³ Pàncìvwà mwànà mutèkète mvwa nè ciibidilu cyà kwamba nè: “Bu mèmè ànu mwà kupetakù mpùngà, pangààkolà, nèndifindè mu nzùbu yònsò bwà kusùulula tukwàcikwètù tukesè.” Èyowà's, mukalenge. Mèmè kwamba... Tusòmbè kuulu kwàka pa muunya mukolè, nè bóbò bamba nè: “Hah, haha, hah,” nè mukàji uvwa pambèlu mwaba kampàndà mu lutanda lwà paanyimà munkaci mwà kunwa mucì wà mfwankà, nè kanyuunyi kakesè kenze nè luse aku kasòmbè mwaba awu munkaci mwà koota muunya awu. Yèyè kèna nè cidìye mwà kwenza bwà bwalu abu to, ùdì ànu nè cyà kusòmba mwaba awu. Kàdi yèyè kàvwà mulela bwà aci to! Mèmè kudyàmbidila nè: “Balùmyàna, bu mèmè mwà kudifinda kuntu kwàka kàdi kumulekela ùpàtuka, kí mmufwànyine kwikalamù ntàntà mule menemene to.” Nwamònu anyi?

¹¹⁴ Ncìtu munangè kumòna cintu kampàndà mu nsànji to. Ncìtu munangè kumòna muntu kampàndà ùdibìikila *mwena Kilistò* pashìishe muswikila panshi kùdì yimwè yà twitabààyi yà mùshindù kampàndà yà èkèleeziyà, “Ncyèna mwà kwamba nè: ‘Amen.’ Ncyèna—ncyèna mwà kwitabuuja *Aci* to. Mpaasàtà ùdì wàmba nè: ‘KanùCitàbùùjì to.’” Kaa, èkèlekèlè, Nzambì wanyì! Udi mulediibwe mudishikàmìne.

¹¹⁵ Kàdi twàmbè bìshi bwà mukankù munène awu's? S'nyuunyi wa mu dyulu. Mmusòmbèle mu mavuba à muulu mwàmwa. Ke mùyàayàye mu dindà kampàndà. Muulu menemene mwàmwa, cintu cikwàbò nànsha cimwè kacyèna mwà kumulondakù to! Kakwena nyuunyi mukwàbò nànsha umwe...mmufwànyine kusùnsuluka mu lupeepèlè bu yèyè mwà kuteeta kumulonda. Yèyè's nnyuunyi mwenza wa wèndè mùshindù.

¹¹⁶ Nè pashìishe muntu kampàndà ùvwa mumukwàte mu butèyi bwenza kùdì muntu, ùvwa mukwàte mukanku munène ewu nè muwèle mu nsànji ewu. Kàdi mukwàcikwètù wa kale mukwàte luse ewu...Mèmè kumutàngila kàdi mwoyi wànyì kusaama bikolè. Wàkatàngila luseke alu mùshindù *ewu* kàdi kàvwà mumanyè mwà kupàtuka mu nsànji awu to. Ùvwa ànu mwà

kutwà eku nè eku muntwamu, nè ùvwa—ùvwa mumanyè mwà kubùuka, kàdi ùvwa ànu mwà kutuuta mapwapwà èndè awu. Kàdi's ke yèyè uvwa mwà kuya ewu, ùvwa mwà kudikùma mutù ku milonda aku nènku ùpòòpoka masàlà à ku dibòkò dyèndè, masàlà à ku mapwapwà aa, nè ku mutù kwèndè kujimà aku, mu mùshindù wà nè ùvwa ùzònza mashi. Ùvwa ùdituuta bikolè menemene ku milonda aku mu mùshindù wà nè ùvwa ùdishinda ùtuuta nyimà panshi. Nènku ùvwa mwà kushààla panshi nè kuvyòngola mèsù à mmwènekèlu mucyòke awu, ùtàngila mu maulu amu nè: “Mwàmwa's ke mwètù. Ke kwànyì kumbèlu. Ke mùmvwà mulediibwe bwà kwendela. Kàdi, tàngilàayi, pankaci pàanyì nè mwómò amu kùdì nsànji. Èè, cintu cimwèpelè cìndi mumanyè, pàndi ntumakù meeji kàdi's ke mèmè ùlwalwà ewu,” nè “bang,” ùvwa mwà kwalukila kàbìdì.

¹¹⁷ Mèmè kudyàmbidila nè: “Kaa, ekèlekèle, kabyèna byènza bwôwà anyi's! Mvwa kujinga nè bàmunsumbisha. Mvwa mwà kweyeka Ford wanyì awu bwà kumusumba, nwamònu's, ànu bwà kumulekelela.” Nwamònu anyi? Kaa, cyàkamfikisha ku didyumvwa bibi be, nyuunyi munène mukwàte nè byà luse awu mwaba awu, kutuutayè masàlà . . . Mèmè kudyàmbidila nè: “S'ki cintu cidì citàmbe bubì cínkaadiku mumòne aci's.”

¹¹⁸ To, ndi ngùumusha awu mèyi, cintu cyà citàmbe kwenza bwôwà cínkaadiku mumòne mmuntu mulela bwà kwikala mwànà wa Nzambì kàdi pashìshe mukàngila mu nsànji kampàndà wa twitabàayi. Nènku ùdi ùtàngila muulu mwàmwa nè ùmòna Nzambì udiyè muswè bulelèlè kukwàcila mudimu awu, kàdi kàyì ànu mwà kucyènza nànsha. Kabàakumulekelakù ùcyènza to, nwamònu's, mukàngila mu nsànji. Aci's ncintu cyà cyènza bwôwà's.

¹¹⁹ Èyowà, èyowà's, mwanèètù wa bakàjì, mwanèètù wa balùme, yònsò udi mufùnde elu awu, pawikalà mudishinde *mwab'ewu* kì mbwena kwamba nè udi mujìmine to. Wèwè's udi ànu mukanku mukwàcila mu nsànji, kwajiki. Udi mukàngila mu nsànji *mwab'ewu* mu mpèkaatù kàbìdì. Kwèna muswè kwikalamù to, ke bwà cinyì udi utàngila muulu. Kì bwalu mbwòbù abu's: “Kaa, Mwanèètù Branham, kale wàwa mvwa musòmbèle muulu mwàmwa, kùdikù njila kaaba aka anyi?” Èyowà.

¹²⁰ Bìdi bìmvùlwija dīngà ditùkù, kaa, mwànà mukesè wa balùme, mvwa ngènda ngèdakana lwà paanyimà pàa ferme apu, nènku kùvwa, muntu kampàndà ùvwa muswikile cikòlòlò kampàndà cyà kale bwà kucilamina kule nè matalà. Kàdi mukwàcikwètù awu ùkaavwa wàmba kufwà nè nzala. Ncivwa mwà kwikala nè lwonji bu nànkù bwà kwenza nànkù to. Wàkaswikila cikòlòlò cyà kale aci ku dikàsà, nènku cikwàcikwètù cyà kale aci cìvwa cidyè byònsò bìvwà mu nyungulwilu waaci amu, kàcivwa mwà kupeta cikwàbò cintu nànsha cimwè to, mwena budimi awu ùvwa ànu mucilekèlè. Nènku cìvwa cikwàte luse mu mùshindù wà kàcivwa—kàcivwa

mene mwà kwimanyina kuulu to. Ànu yêyè. . . Nènkù bikòlòlò bìvwa mwà kubùùkila lwà mwaba awu nè kwamba nè: “Koo, koo, koo.” Mu ngaakwilù mukwàbò, byàmba nè: “Lwàkù, Johnny Cikòlòlò! Muvù wà mashika wùdì wùlwa, lwà tùye ku sud!” Kàdì cyòci kacivwa mwà kucyènza to, ùvwa muswikìibwe.

¹²¹ Ke dîngà ditùkù mulùmyànà kampàndà kupicilayè mwaba awu nè kumòna cikòlòlò cyà kale cyenzè nè luse aci, pa nànkù kuyayè ànu tàmakàtàmàkà è kucikwàtayè nè kucisùululayè, kwamba nè: “Ndaàku, mulùmyànà, udi mudiikàdile.” Nwamònu anyi? Nànkù dîbà adi, katanci aka anyi, kutùngunukaci nè kwenda kunyùnguluka.

¹²² Ke bikòlòlò bìlwalwà ebi, byèla mbilà nè: “Lwàkù, Johnny Cikòlòlò! Koo, koo, koo! Lwà tùye ku sud, muvù wà mashika wùlwalwa. Neufwe nè mashika makolè.”

¹²³ Bu cyòci mwà kwela mèsù paanyimà, kwamba nè: “Ncyèna mwà kwenza nànkù to.” Nwamònu’s, cikaavwa ciibidilàngàne bikolè ku diikala ciswikìibwe, nwamònu’s, cìvwa ànu cidyàmbidila nè cìcìvwa ànu ciswikìibwe’s.

¹²⁴ Udi mwà kwela meeji nè udi muswikìibwe, wèwè pèèbè, mwanèètù wa balùme, mwanèètù wa bakàji, udi mufunde lukonko elu awu. Udi mwà kwela meeji nè dyabùlù mmukuswikile panshi mwaba awu, kàdì ùdì ùshima. Kwàkalwa Muntu pa buloba, Yesù Kilistò, Mwànà wa Nzambì, Yèyè wàkacusùulula. Kùcìtábùùjiku to; kabyèna bikèngela bwà wèwè kushààla kwínshì kwàka to, to, mukalenge, udi mudiikàdile. Ncyà bushùwà. Yèyè wàkafwà pa kaaba kèèbè bwà kuumusha mpèkaatù yèbè. Wèwè Mwitàbùùje ànu, tuuta mapwapwà èbè nè bùùka ùye nè bakwàbò abu. Kùshààdi mu dijimbà dyà dyabùlù adi to. To, mukalenge.

Mpindyewu. Udikù mwà kuntentekela byanza bwà kunsùulula ku cyòci aci anyi?

¹²⁵ Mwanèètù wa bakàji munanga anyi mwanèètù wa balùme munanga, bushùwà, ndi mwà kukutentekela byanza, kàdì aci kî ncifwànyinekù kukusùulula to. Cìdì mwà kukusùulula, wèwè udi. . . nkumvwa nè wèwè ukàadi mudiikàdile. Ukàadi mumanè kwikala musùulùdìibwe. Kabyèna bikèngela bwà wèwè kuditàcisha bwà kwikala mudiikàdile to, ukàadi mumanè kwikala mudiikàdile! Yesù ùkaadi mukuvwije mudiikàdile. Kùswikiibu cyàkàbidì mu cikòkedi cyà bupika to. Udi mudiikàdile nè mwèbè mwònsò. Kabyèna bikèngela bwà wèwè kuswikìibwa to. Kukutentekela byanza cìdì ànu cilèlè. Tudi bafwànyine kwenza nànkù. Aci, mòna’s, mèmè’s ndi mwà kucyènza, kàdì aci kî ncifwànyine ànu kukushiya mudiikàdile to paùdì kùyì mwitàbè cìdìYe mukwenzèle aci; awu’s udi ànu mmèmè udi wamba nè “Mukalenge, ndi nCìitabuuja.”

¹²⁶ Èè, wèwè tentèkè ànu byanza byèbè abi ku diitabuuja pa Yèyè, wamba nè: “Mukalenge, ndi nCìitabuuja,” apu kaayi udi

ubànduluka. Ncyà bushùwà, tondà mpèkaatù yèbè. Nwamònu's: "Ewu udi usokoka mpèkaatù yèndè kàakutanta to, ùdi ubwikila mpèkaatù yèndè. Kàdi ewu wâtonda mpèkaatù yèndè. . ." Ke mwaba uwásanganà budishikaminyi nè dibingishiibwa ngwówò awu, paùdi muswè kwamba nè "Ndi mwenzè mpèkaatù, ndi mupiiile." Ke ciwãmbi apa nè:

Ndi mudishinde, ndi mwenzè mpèkaatù. Ndi mufwè naayi! Kùdikù mpùngà wa mèmè kwakalujiibwa cyàkàbidi anyi?

127 Kakùyì mpatà to! Mu kasunsa ànu kaùdi uMujinga aku, aci cidi cileeya nè Nzambi mmupwekeshe Nshinga wa disungila bwà kukujuula panshì. Juukila wèwè ànu ku Nshinga Wendè wa diitabuuja nè disambila, bànda buludì ùkabwela mu mikankù mikwàbò mùshindù awu, ndà wenda utuuta mapwapwà. Ncyà bushùwà.

128 Èyowà, ditentekelangana dyà byanza, aci's—aci's ncintu cinène, mèmè ndi ngiitabuuja aci. Mèmè ntu ngiitabuuja ditentekelangana dyà byanza, ntu ngiitabuuja cyà bushùwà. Kàdi kí ng'aci cidi cyèenza bwalu to. Ndi mufwànyine kutentekela bantu byanza, ku lumingu ku lumingu, kàdi kabyàkwikala ànu mwà kukwambulwisha to paùdi kùyì mwitàbe cidi *Kilistò* mukwenzèle to. Aci's cidi ànu diitaba dyànyì cyanàànà dyà bwalu, ditentekelangana dyà byanza. Bàvwa bàtentekela bakulù byanza. Bààkenza bintu abi, cìvwa ndiitaba dyàbò dyà bwalu kumpàlà kwà Nzambi bwà nè bàakafila diitabuuja dyàbò ku cyôci aci, bàvwa nè diitabuuja dyàbò ku cyôci aci. Nwamònu anyi? Misangu mikwàbò, ànu mùdi bintu. . .

129 Bātu bàngumvwa bibì misangu yàbùngì be. Ndi—ndi nè. . . makèèlèlè dilòòlò awu. Ndi mupangè kwà kwela dínù nè kwà kwela dikàla, nè ncyèna—ncyèna ànu mumanyè kwà kuya nè mpenyi to. Ndi—ndi, mèmè mwinè, ndi pankaci pàà mmwènenu, ncyèna—ncyèna mumanyè cyà dyenza to. Ndi ntèkemena nè eci cidi ànu èkèleeziyà wa mubidi, anyi èkèleeziyà wa nyumà udi musòmbe kaaba aka ewu's wè, èyowà, Ncyèna ngèèla meeji nè bàdi munkaci mwà kukwàta eci pa mukàbà wà mèyi to pa nànkù nèngàmbè ànu cìndi muswè kwamba aci. Bwòbò. . .

130 Mvwa mujinge muyiiki mukesè wà ku mwoyi wà munda neenù, nènku ndi ngèèla meeji nè nèngwenzè, nànsha bishi. Mvwa nè kabèji kafùnda mwaba ewu nè Mufùndu kampàndà, anyi. . . Byòbì kabiyi nànkù to, mvwa muswè kwakula pa *Butangadiki Bwà Cikondo Cyà Nshùkidilu*, cidi butangadiki bwà ku cikondo cyà nshùkidilu bùmvwija. Pàmwăpa nêndaminè aci bwà ditùkù dikwàbò. Ndi muswè kuyiikilangana neenù byà bifùmina ku mwoyi wànyì, ànu byà bifùmina panshì pàà mwoyi wànyì.

131 Ndi pankaci pàà mmwènenu, ncyèna mumanyè kwà kwela dínù nè kwà kwela dikàla to. Ndi dijinga nè disambila dyènù. Ditwàngaja dikesè edi mwab'ewu, pa ebi—pa bintu ebi, mvwa

munkaci mwà kupeta mpùngà wa kuyiikila neenù mu tusunsa tukesè. Cikwàbò cintu cìndi njinga kunwàmbila, nwamònu's. Ndi mfika ku dyumvwa nè tudi pabwìpì menemene nè cintu kampàndà. Mpindyewu, kanùngùmùvù bibì to, kanwènjì nànkù to. Nwamònu anyì?

¹³² Muntu kampàndà kulwa kùndì ditùkù adi kàdi kumfikisha ku didyùmvwa bibì be. Mémè kudyàmbidila nè: “Ncyà bushùwà nè ncyèna ànu mulekèlèle maalu nànkù mu dilongesha to.” Nwamònu anyì? Yèyè nè: “Mwanèètù Branham, mu matùkù matwè ku búngì kampànda ndi nè cyà kupandiibwa, mu matùkù dikùmi nè àtaanu, makùmi àbìdì àdì àlondà aa.” Yèyè nè: “Udi wela meeji nè Yesù neikalè kaaba aka, nè kabyàkukèngela mene bwà mémè kupandiibwa anyì?” Nwamònu anyì? Nudi numòna's, nudi nuCyùmvwa bibì. Kanwènjì nànkù to! Nwamònu's, kanwènjì nànkù to. Yesù ùdi mwà kubènga kulwa mu bidimu bikwàbò binunu bitaanu. Ncyèna mumanyè to. Yèyè ùdi mwà kwikala kaaba aka dilòlòlò edi. Yèyè ùdi mwà kulwa mààlàbà. Ncyèna mumanyè nè Yèyè ùlwalwa dībà kaayì to, muntu mukwàbò nànsa umwe kí mmumanyè to. Bwà kwamba menemene, kèna nànsa mumanyè Yèyè Mwinè to. Ke cyàkambàYe ncyòcì aci. Muntu nànsa umwe kí mmumanyè to.

¹³³ Kàdi nuvwakù bamanyè nè Pòlò ùvwa muMwindile bwà kulwa ditùkù dyònsò anyì? Yone, mu cisanga cyà Paatèmò, wàkeela meeji nè ùvwa mwà kushààla nè mwoyi too nè ku dicimòna. Irénée wàkadyàmbidila bushùwà nè Yèyè ùvwa ùlwa mu matùkù èndè. Bakwàbò bònsò abu, Polycarpe, Martin Munsantu, mu bikondo byònsò abi. Luther kudyàmbidilayè nè: “Bulelèlè's ke cyòcì aci!” Wesley kwambayè nè: “Ke dībà ndyòdì edi.” Charles Finney, John Knox, Calvin, Spurgeon, yònsò wa kùdìbò wàkamba nè: “Ke dībà ndyòdì edi!” Billy Sunday, too nè ku ditùkù edi kaaba aka, muntu nè muntu: “Dībà ndyòdì edi!”

¹³⁴ Tudi badindilè. Katwèna bamanye nè ndībà kaayì to. Ndi ngìtabuuja nè ndībà edi, nè ndi muswè kulama mwèndù wà toolòshì kacya wàteema. Nènkù tèèlejààyi, ndi. . . Kwàtaayi eci bimpè! Ndi muswè kwikala nè mwoyi cikondo cyònsò cyà mwoyi wànyi nè ndi muMwindile kasuna kàdi kalondà, kàdi ndi muswè kutùngunuka byenzè bu nè mbifwànyine kwikala mu bidimu binunu dikùmi kuumukila ku mpindyewu. Ncidi ànu muswè kumyamina mamiinu, kunowa dinowa. Ndi muswè kuyiisha Èvànjeeliyò nè kutùngunuka ànu mùntù ngèza misangu yònsò amu. Kutùngunuka ànu nànkù, nè mèsù ànyì matàngija muulu, munkaci mwà kutàngila; mpulumunangana nè kalààlù kàà. . . ngàngatangana nè myepu, ntete ayi. Nè pashìishe cidimu cidi cilonda nèmmyaminè cyàkàbidi byà pa madimi byànyi: “Mukalenge, mvwa ngèèla meeji nè Wèwè uvwa mwà kwikala mwab'ewu cidimu cishààle eci, kàdi Wèwè kùyì mulwè to, Udi mwà kulwa cidimu eci. Pa nànkù nènkunè byà pa madimi byànyi bwà kukolesha bàna bàanyi. Wèwè munènge, nèbàpete

cyà kudyà; Wèwè kùyi munènge to, nèngiikalè ànu muKwindile.” Ki bwalu mbwòbù abu’s, nwamònu’s, kutùngunuka ànu mwèbè nè kale.

¹³⁵ Bu mèmè mwà kwela meeji nè Ùlwalwa mu dindà, dilòlò edi ndi mwà kuyiisha diyiisha dimwèdimwè dindi nyiisha mpindyewu edi. Bu mèmè mwà kwela meeji ne Ùvwa ùlwa mu dindà, ncyèna mufwànyine kupàtuka kuya kasùmbisha kàshinyi kàànyì to, ncyèna mufwànyine kuya kenza *cikampàndà*, *cikansanga*, anyi *cikankènga* to. Ndi mufwànyine ànu kutùngunuka nè kuya bu mwànyì nè kale, bwalu ku cikondo cyònsò ndi muMwindile bwà kulwa. Bwalu Yèyè mmufwànyine kulwa ànu bwèbè wèwè, mbifwànyine kwikala nè dîbà dyèbè ndifwànyine kwikala dilòlò edi. Pàmwapà ndîbà dyànyì dilòlò edi. Ncyèna mumanyè to. Kàdi dimwè dyà ku òwù nedîikalè dîbà dyètù.

¹³⁶ Kàdi mbishîllàngàne ku cinyi bu mèmè mwà kwikala nè mwoyi apa anyi mujiikiibwe kuntu kwàka? Bwalu piikalàbi nè nkàadi mumanè kufuta cibawu cyà lufù, nèngiikalè kuntwaku kumpàlà kwà muntu kanà yònsò udi nè mwoyi ewu. Ncyà bushùwà. “Ndi ngamba nùku ewu,” Teesàlònika Mwibìdi, nshapità mwi5 nè: “Ndi nnwàmbila eci mu Méyi matùma à Mukalenge. Twètù bàdi nè mwoyi nè bashàale too nè ku Dilwa dyà Mukalenge katwàkupangisha anyi kupùmbisha aba bàdi balàale tulù nànsha. Bwalu mpungi wa Ñzambì neàdilè, nè bafwè mu Kilistò nebàbiikè dyàmbedi,” dyèsè ndyà aba bàdi bafwè nebàlwe dyàmbedi. Mùshindù awu ke wutùdi tumanya nè cidi pabwìpi, nwamònu’s. “Dîbà adi twètù bàdi nè mwoyi nè bashàale netùshintuludiibwè, mu katanci, mu mubùnyì wà dîsù, nè netwàngaciibwe muulu pàmwè naabò, bwà kutuutakeena nè Mukalenge mu mpeepèlè.”

¹³⁷ Pa nàнку bìdi bishintulula cinyi bu mèmè mwà kufwà mu cikondo cyà Noà, bu mèmè mwà kufwà mu cikondo cyà Abraham, bu mèmè mufwè mu cikondo cyà bàpostòlò, bu mèmè mufwè kùkaadi mbingu yibìdi, anyi ànu mpindyewu mene? Mbifwànyine kushintulula cinyi? Mèmè nèngiikalè kuntwaku mu katanci kakesè, mu mubùnyì wà dîsù, ndi ànu munkaci mwà kwikisha too nè ku cikondo aci.

¹³⁸ Mpindyewu, didisanga nedyènzekelè kùdi Mukalenge. Ànu bu Yakòbò, mu nshapità wa 49, wàkamba nè: “Pààlwà Shiilò, nè didisanga nedyènzekelè Kùdiye. Kakwàkwikala mwedi wa mikenji wàya too nè...kwambwila ànu pankaci pàa makàsà, too nè pààlwà Shiilò,” wàkula bwà Yudah, “nè kùdiYe ke kwènzekela didisanga.”

¹³⁹ Mpindyewu, bantu bààbùngì menemene bàdi munkaci mwà kukèba èkèleeziyà kampàndà, musùmbà munène wà bantu bwà kwàngaciibwabò muulu pàmwè, èkèleeziyà kampàndà,

mu mwoyi nebàmonè Nzambì,” nè dibìikà dyà ku lufù nè didìsangisha nebyènzekelè myaba yònsò.

¹⁴⁵ Nènku, mpindyewu, nedilwe dîbà kaayi? Pàmwăpa dilòòlò edi, pàmwăpa mààlabà, pàmwăpa cidimu eci, pàmwăpa mu bidimu makûmi àtaanu, pàmwăpa mu bidimu lukàmà, pàmwăpa mu bidimu bikwàbò cinunu. Ncyêna mumanyè to. Muntu mukwàbò nànsha umwe kî mmumanyè to. Kàdi twanjàayi twètù—twètù, nwènù nè mêmè, kwikala nè mwoyi dilòòlò edi byenze bu nè bìvwa nè cyà kwikala ànu dilòòlò edi.

¹⁴⁶ Kàdi, mpindyewu, mu kwenza kwà maalu bu muwàcyămbi amu nè: “Ndi—ndi nè cyà kupandiibwa.” Èè, byòbì nè udi nè cyà kupandiibwa, wêwè kûyi nè diitabuuja bwà disùngidiibwa to, lekèla bàkupandè.

¹⁴⁷ Bu nè mwăwa nè cyà kusumba ci—ci... Muntu kampàndà wàkalwa nè kumfùndila kabèji ditùkù adi, wamba, mukàndà mu—munène, wamba nè: “Mwanèètù Branham, ncyêna mumanyè cyà dyanza to.” Yêyè nè: “Mêmè nè mukàjàanyi tudi nè lulamatu lwàbûngì kùdì Nzambì nè mwètù pèètù mwònsò. Tudi bakolèshe bânà bèètù balela.” Ke yêyè nè: “Mpindyewu, cîndi ndikonka ncyà nè,” yêyè nè, “tudi nè...tudi balamine ferme kampàndà, basùmbe ferme.” Ke yêyè nè: “Mùshindù mwinè wutùdì bamunangè's wè! Kùdì kasùlù kampàndà muntwamu; kùdì ka—kasùlù kakesè kapweka mu mwaba awu.” Cîvwa mmu Oregon mwámwa. Ke yêyè nè: “Tudi buumvwè nè udi ulwa ku Oregon. Nènkwanbìlè citùdì bapàngàdike bwà kwenza. Tudi bamanyè nànkù...Tuvwa twela meeji nè tuvwa mwà kumulamina bânà, bwalu nànsha umwe wa kùdibo kî mmwena Kilistò to.” Yêyè nè: “Tuvwa twela meeji nè tuvwa mwà kubàlaminayè bu mùdìbì bikèngela bwà kushààlabò pànwapa bwà kupicila mu dikènga dinène, nè kubàlaminayè bwà bìikalèku nè cintu kampàndà, bwalu tudi twitabuuja nè netwikalè mu Dyambwibwa. Ki bwà cinyi katwèna bamanyè cyà dyanza pa bwalu abu to, pa nànkù pàmwăpa pawàlwà apu netùkupèèshè wêwè ànu ferme awu, nwamònu's, nènku dîbà adi wêwè udi mwà kwenza nendè cyònsò cyùdì muswè aci.”

¹⁴⁸ Mêmè kwandamuna, kwamba nè: “Mùshindù wùdìbì byà kalolo bwà kwelela bânà bèènù balela meeji's.”

¹⁴⁹ Yêyè nè: “Mêmè nè mamwabò tutu tuya kuntwaklu, mèbà à dilòòlò.” Yêyè nè: “Nkaadi pabwîpì nè kwangata pànsiyò, nè,” yêyè nè, “mmèbà à disànkà kaayipu atùdì tupicisha, bwà kutwa eku nè eku kwà ferme awu, tutàngila kasùlù aku, nè biimàne mwaba awu tutùmbisha Nzambì.”

¹⁵⁰ Mêmè nè: “Tùngunukaayi nè kwenza nànkù, kwikala nè mwoyi ànu mùshindù awu, mu mubidi, nè mu bintu. Tùngunukaayi ànu nè kutùngunuka too nè pààlwàYe. Nwamònu's, tùngunukaayi ànu nè kushààla apa, tùngunukaayi too nè pààlwàYe.”

¹⁵¹ Longòlòlà cyà dyenza, nda mutàngile kumpàlà, ùcyénzè nè: “Bu Mukalenge mwà kwanyisha! Bu Mukalenge mwà kwanyisha! Nèngénzè *cikampàndà*, bu Mukalenge mwà kwanyisha.” Yèyè ùdi mwà kulwa kumpàlà kwà díbà adi. [Katùpà kàà mukàbà wà mèyi munda mutupù—Muf.] Kàdi tùngunukà ànu mùdi wenda uya amu too nè... Kàdi shààla mulamè musùùkà wèbè mulongolola, bwà nè, mMuḡwànyine kulwa mu kasunsa kanà kònsò. Nwamònu’s, ikàlà mudìlongòlòle. Bwalu, nudi numòna’s, Yèyè mmuḡwànyine kulwa bwèbè *wèwè* mu kasunsa kanà kònsò, mu kasùnsukilà kàà kasunsa kanà kònsò, dituuta dyà mwoyi dídì dilondu, mweyelu wùdi wùlonda awu, Ùdi mwà kulwa bwèbè wèwè. Kàdi tùngunuka ànu nè kwenza cyònsò cyùdi muswè aci, pùikalàci ànu cilelèlè nè cyà kaneemu nè cijaalàme, tungunuka nè kucyénza.

¹⁵² Mpindyewu, tudi bamanyè nè tudi bakùngàmàngàne nè cintu kampàndà. Ndi mucimanyè; wèwè udi mucimanyè. Mèmè—mèmè—mèmè ncyèna mumanyè kwà kwela dìnù nè kwà kwela dikàlà nànsa. Nudi bavùlùke kùkaadi bidimu bitwè ku binaayi, mu Chicago mwàmwa dīngà ditùkù, Nyumà wa Mukalenge wàkalwa pambidi pàànyì nè mèmè kwamba nè: “Ke cyòci eci’s! Nènku ditàbuluja dyàjiki, kàdi’s Àmèrikè mmudyombòle mpùngà wendè.” Cìdi pa mukàbà wà mèyi. “Nè kakwàkwikala kàbidi mukwàbò to. Mpùngà wendè wa ndekeelu ngudiyè mudyombòle ewu.”

¹⁵³ Ndi muswè bwà nùtangilè bīmpè. Kùdikù muntu udi mumanyè nè nditùkù kaayi divwàbi bikwàta pa mukàbà wà mèyi awu anyi? Tudi naaci. Leo nè Gene bàdi naaci. Mwva mucyūmwè kàaba aka ànu matùkù mashààle aa. Boze ùwva mucifunde pa dibèjì dyèndè. Kàdi mpindyewu tàngilàayi cìdi cyenzèke kacya ànu díbà adi, nwamònu’s, ditàbuluja ndiimàne.

¹⁵⁴ Mwva mwàmbè aci ku—ku Blue Lake kwàka dilòòlò adi, nè mukwètù mutekète kampàndà kwalukila kuntwaku pàakacyàbu, kwamba nè: “Mwanèètù Branham mmuḡwànyine kwamba nè beena Mpenta kwàbò nkujike, kàdi kí mmèmè to! Butùmbi kùdi Nzambi’s wè! Àlèluuyàh,” ànu nànkù. Nwamònu’s, kàdi mukwètù mutekète awu kàvwa mumanyè nè nku luseke kaayi kùvwàye wèlela mpungi aku to. Nwamònu’s, kèna ùmwva to. Nwamònu’s, kí mmumanyè to. Bidi ànu bīmpè, kwikala musalùke, abi’s bìdi ànu bīmpè menemene.

¹⁵⁵ Kàdi anji kenzakanàayi! Cìdibo munkaci mwà kwenza ncinyi? Mbwalu kaayi ebu nè bantu’s? Cìdi cyenzèkèle ditàbuluja ncinyi? Cìdi cyenzèkèle Billy Graham, Oral Roberts, nè bakwàbò abu ncinyi? Ditàbuluja dyèpi munkaci mwà kwenzeka? S’ndijikè! Mwishi mmujikè. Mamiinu mmakùna. Disangisha dyàjiki. Tupyà ntujìme. Mu ntempèlu wa kale wa Loomò, mu Vesta amu, pàvwa tupyà tùjima, ku byalatare, bangeèndàmùshìngà bàvwa bàpinga ku mààbò. Mpindyewu,

tudi tumòna nè ditàbuluja kí nditùngùnùke to. Kakùcyèna dizùka to.

¹⁵⁶ Pashiishe ndi ngèèla meeji ku musùlu kwàka mu cidimu cyà 1936, ndi ngeela meeji ku cyàkambàYe. Cyàkenzekà kuntwaku ncinyi? Baàbùngi bàà kunùdi's mbamanyè. Nèicivwa ànu nsongààlùmè, mwikàle mbàtiiza mu dibàtiiza dyànyì dyà kumpàlà pàakapwekà Mwanjèlò wa Mukalenge awu nè kwimana mulembèlèle mwaba wùmvwà nsanganyibwa awu. Bàmwè bantu kwambabò nè: “Kùvwa mucimòne to.” Pashiishe maalù à mamanya kujaadikawù nè bìvwa nàнку. Nwamònu anyi? Nwamònu anyi?

¹⁵⁷ Mpindyewu, cyàkambàYe mwaba awu ncinyi? “Ànu mwàkadibì, mùvwà Yone Mubàtiiji mutùmiibwe bwà kudyànjidila dilwa dyà kumpàlà dyà Kilstò, Mukenji wèbè wèwè newùdyanjidilè Dilwa diibidì.”

¹⁵⁸ Ndi mucitàngile pa buloba bujimà, kuyaci pa buloba bujimà. Ànu bu leelù nè màalabà, matàbuluja è kubwayika myaba yònsò. Tupyà twà ditàbuluja tùvwa tùlàkuka myaba yònsò, ke ditàbuluja dyà ditàmbe bunène ditùtùku bamanyè kacya ndyòdi adi. Kàdi kùvwakù cintu kampàndà kumpàlà kwà cyòci aci anyi? Cintu nànsha cimwè! Mpàvwà mbingu yibidì kumpàlà kwà cyòci aci, mèmè kuumvwa muntu wàkula mu New Albany, wamba nè: “Bantu bàvwa nè ciibidilu cyà kwitabuuja lutooyitooyi lwà—lwà ditàbuluja alu, bu mùdi Billy Sunday nè bakwàbò abu.” Yèyè nè: “Tudi bamanyè nè kakwèna mwà kwikala kàbidì byà nàнку to. Bantu mbaswè cileeeji cyà bàlenga nè byanza; cintu bu nàнку kacitukù to!” Pàvwàbo munkaci mwà kwenza lutooyitooyi lunène alu, ànu dibà dimwèdimwè adi Nzambi kutuuta dikùbakùbà dyà ditàbuluja ditàmbe bunène ditùvwà naadi kacya ku bidimu lukàmà byàbò byà mbangilu abi, bantu bapite bùngi mbasùngidiibwe: mìlìyò.

¹⁵⁹ Makùmi à dibadika àdi àleeja nè mukenji wà muntu wùtu wùnenga bidimi bisàtù, yònsò wa kùdìbo, pashiishe yèyè ùdi ushààdila nè mwoyi pa luumù lwèndè alu kikondo cyònsò cidi cishààla aci too nè pàdi Nzambi ùmubiikila. Mpindyewu, aci's nkacya ku Kilstò, Dyèndè dyàkenza bidimu bisàtù nè citùpà, nwamònu's. Nèнку ncileeeja nè bònsò, Spurgeon, Knox, Calvin, too nè ku ndekeelu, bìdi bìleeja bidimu bisàtù too nè ku bisàtù nè citùpà ke ndekeelu wa mudimu wà bwambi wà muntu. Bikwàbò bìdi bishààla abi... Kandeyi kèndè kàdi kàteema kàjika, ùshààdila nè mwoyi ku luumù lwèndè lwà kale alu. Pìikalàye mubì, byenzedi byèndè—byèndè bìdi bimulonda; pìikalàye mujaalàme, byenzedi byèndè bìdi bimulonda. Kwàjiki.

¹⁶⁰ Mpindyewu, aci cìvwa cyùmvwija cinyi? Mvwa nyiisha èkèleeziyà ewu mwab'ewu nnwàmbila nè “Mvwa ngiitabuuja nè kuvwa kulwa munène kampàndà.” Ndi giitabuuja nè munwambile nè “Ndi ngiitabuuja nè Mifundu yidi yijaadika nè

nekwikalè mùsànjeelà wa cikondo cyà ndekeelu cyà èkèleeziyà.” Ndi ngiitabuuja nànkù. Nkàadi mwindile bwà muntu awu kumwènekayè, ndi mumwindile ku dîbà dyònsò.

¹⁶¹ Nènkù ndi mmòna muntu kampàndà ùjuuka, ndi nguumvwa bààkula bwèndè nè, muntu munène kampàndà ùkùtula dibùndulula ndi mmòna mukenji wèndè mwikale kule menemene nè Bible. Ndi mmumòna ùbùùka wàlukila lwà mu ditumba. Nwamònu anyi? Ndi ntàngila mukwàbò ùjuuka, ùbùùka muulu mwàmwa, kàdi yèyè kèna ùbwela munkaci mwà mikankù to, ùdi ùshààla munkaci mwà bikòlòlò byà cyena-màngumba. Ùshààla panshi *apa*, bulongolodi bwèndè, nè mukwàbò ùbwega bidimba bipite bùngi nè bikwàbò. Ndi ncitàngila, ndi ncimòna cìfwà.

¹⁶² Mémè kudyàmbidila nè: “Nzambi, ewu wíkala mwà kwalujulula Diitabuuja dyà baataatù kùdi bàna awu wèpì? Mamiinu awu neàkùnyiibwè penyi? Àdi penyi? Ncinyi cidi nè cyà kwenzeka?”

¹⁶³ Mpindyewu cidi cìkafika ku eci. Pìikalà—pìikalà Mukenji wà ku musùlù kwàka ditùkù adi awu, pìikalàbi nè cìvwa ncyôci, Dilwa dyà Mukalenge dikaadi pabwìpì, dikaadi pabwìpì apa. Byòbi kabìyì nànkù to, kùdi ditùùkija kampàndà kumpàlà kwà mvùla wa cipùpù. Ncyèna mumanyè to. Yèyè kí mmucimbuulwile to. Ndi nteeta kudìkonka nè: “Aci cìvwa mMukenji Wèndè wa mumanyike anyi? Ke cyònsò cìvwa Ye muswè bwà mémè kwamba aci anyi? Cìvwa ng’aci pàakatùmà Ye nè mudimu apu anyi? Ke cyònsò cìvwa ku anyi? Byòbi nànkù, tukàadi pabwìpì menemene, menemene. Dîbà dikaadi diyè bikolè kutàmba munùdi nwènu nwela meeji amu. Pìikalàbi kabìvwa nànkù to, kùdi ditùùkija kampàndà kumpàlà kwà mvùla wa cipùpù.

¹⁶⁴ Mpindyewu, muntu kampàndà mmumfùndile kaaba aka ànu àbìdì àdì panshi aa, nè munkonkè nè: wàmba nè: “Pawikalà kùyi witabuuja nè èkèleeziyà ùdi ùpicila mu cipungu cyà Dikènga dinène to, kàdi twàmbè bìshi bwà Bwàkabuulwibwà 13, mwàkacimunabo ku Mashi à Mwànà wa mùkòòkò nè bujaadiki bwàbò?” Muntu awu wàkeela lukonko alu. Ndi ndikonka. Nudikù bamanyè nè nshapità yisàtù yà kumpàlà yà Bwàkabuulwibwà yìdi yitàngila Èkèleeziyà mu cikondo cyà Èkèleeziyà anyi? Aci’s ncipungu cyà Dikènga dinène, kí ncikondo cyà Èkèleeziyà nànsha; Èkèleeziyà ùdi ùya mu Dyambwibwa nè ùbànda ku nshapità mwi4 wa Bwàkabuulwibwà, kèna ùlwa kàbìdì to too nè ku nshapità wa 19 pàdi Ye ùlwa nè Yesù pàmwè. Ncyà bushùwà. Aci’s mmu cipungu cyà Dikènga dinène, kí ncitàngile Èkèleeziyà mu cintu nànsha cimwè to nànsha kakesè.

¹⁶⁵ Milayì minène yònsò ya bintu binène binùdi bamòne mu Bible ebi, bu mùdi bìikalà mwà kwenzeka abi, aci mmu bukalenge bwà beena Yudà, kí mmunkaci mwà bàà Bisàmbà byà bendè emu to. Ndi ngiitabuuja nè nebàsangishiibwè kùdi

ewu udi nè cyà kulwa awu bwà kwalujulula Diitabuuja dyà bantu, didi dilaya adi. Nè mùshindù wùmwèpelè wùndiku mwà kucipeta, bwalu Yèyè mmwâmbè nè: “Dyàkâmwè paanyimà pàà Mukenji ewu, bwà nè, buloba nebwòshiibwè nè luuyà, kapyà.” Lekèlaayi nnùbadilèku ànu cyôci aci patùdi ànu kaaba aka apa, nè tàngilàayi cidiCi cyâmba.

¹⁶⁶ Nènku mpindyewu diyiisha dikesè dyà Bukalenge edi, pàmwâpa ndi mufwânyine kudiyiisha mu dindà dyà dyàlumingu dilwalwà edi, bu Mukalenge mwà kwanyisha, nwamònu’s, nènku bu Mukalenge mwà kwanyisha.

¹⁶⁷ Mpindyewu tàngilàayi apa, dilwa dyà Yone ndyôdi edi, Maalàki 3:

Mònaayi, ndi...ntùma mùsânjeela wanyì kumpalà kwà Wanyì...ntùma mùsânjeela wanyì, nè yèyè neàlongololè njila kumpalà kwányi: nènku Mukalenge, unùdi nukèba awu, neàlwe dyàkâmwè ku ntempèlu wendè, mùsânjeelà wa cipungidi mene, unùdi nusànkila awu: mònaayi, yèyè neàlwe, mùdi MUKALENGE wa bilwilu wàmba.

¹⁶⁸ Nudi numòna aci anyi? Maalàki 3. Maataayi mpindyewu, tàngilàayi Maataayi nshapità wa 11, nènku tèèlejàayi eci, ku mvensà mwi6. Tùbalàayaaku mpindyewu Malà-...Maataayi 11, Yesù ngudi wakula ewu. Nènku mpindyewu tùbangilàayi ku nshapità wa 11:

Kàdi byàkenzeka nè, pàakajikija Yesù ditùmina Dyèndè dyà bayiidi bèndè dikùmi nè bàbidi diyì, yèyè wakuumuka mwaba awu bwà kulongesha nè kuyiisha mu bimenga byàbò.

Nènku mpindyewu pàakumvwà Yone mu...buloko byenzedi byà Kilistò, wàkatùma bàbidi bàà ku bayiidi bèndè,

Ke kumwambilayè nè: Wèwè ke yèyè uvwa nè cyà kulwa awu, anyi twìndile mukwàbò?

¹⁶⁹ Nwamònu dibungama dyà mupròfetà awu anyi? Yèyè’s ùvwa mumanyè nè cintu kampàndà cìvwa nè cyà kwenzeka, kàdi kàvwa mutwishiibwe mwaba wùvwàci cìsanganyibwa to, nwamònu’s, nwamònu’s, cìvwà menemene munkaci mwà kwenzeka aci. “Wèwè ke Yèyè awu anyi?” paanyimà pàà yèyè mumanè kuMumanyisha ku bantu.

Nènku Yesù...wàkabàmbila nè: Ndàayi nuleejè cyàkàbidi Yone bintu binùdi nuumvwa bulelèlè abi nè numòna:

Mpofo yidi yitàbala,...balèma bàdi bènda, beena nsudi bàdi bàkezudiibwa,...mpudimaci yidi yùmvwa, bafwè bàdi bàbishiibwa ku lufù, nè bapèlè bàdi bàyishiibwa èvânjeeliyò.

Nè wa dyàkalenga ng'ewu, udi kàyì ulendwishiibwa bwà bwalu bwànyì to.

Nènku pààkayàbo apu, Yesù wàkabanga kwambila musumbà wà bantu bwalu bwà Yone nè: . . . (Tèelejàayi mpindyewu!) . . . Cinùvwà bayè kamòna mu cipèlè ncinyi? Dilèngà dídìbo bànyùkusha kùdì lupeepèlè anyi? (To, awu kàvwa Yone to, kàkùvwaku didyà dyà cibangà kùdì Yone to.)

. . . cinùvwà bayè kamòna ncinyi? Muntu muvwàle bivwàlù binefùke anyi? (Mu ngaakwilù mukwàbò, nè nkoolò munyùngùlùke, nudi bamanyè's, nè mumanyi wa dibàla nè muntu munène) mònaayi, aba bàdì bàvwàla bilàmbà binefùke bàdi mu nzùbu yà bamfùmù. (Aba bàdì bàtwa bàna bàà mu mabòkò mishiku, nè basèlesha bàna, nè bàjiika bafwè, nè, nudi bamanyè's, anyi kacya ànu bàànyùngulukila bamfùmù. Ke bàà mùshindù awu, kabèèna bàkòòkesha kukwàta mwele wà mvità wà nseke yibidì awu to. Nwamònu anyi?)

. . . Mpindyewu, cinùvwà bayè kamòna mu cipèlè ncinyi? Muntu mulùme nè bilàmbà byèndè, kàdì munyùkusha kùdì lupeepèlè anyi?

. . . Muntu muvwàle bivwàlù binefùke anyi? mònaayi, aba bàtù bàvwàla bilàmbà binefùke bàdi basanganyiiibwa mu nzùbu yà bukalenge yà bamfùmù.

Kàdì cinùvwà bayè kamòna ncinyi? Mupròfetà anyi? èyowà's, ndi nnwàmbila nè, mutàmbe mene nè mupròfetà.

¹⁷⁰ Tàngilàayi! “Bwalu ewu. . .” Tèelejàayi mpindyewu, eci m'Mèyi à Yesù Yèyè mwinè:

Bwalu ewu ke yèyè, wàkafundabò nè: Mònaayi, Ndi ntuma mùsànjeela wanyì kumpàlā kwà Diitabuuya Dyànyì, nè yèyè. . . kumpàlā, nè yèyè nèàlongololè njila kumpàlā kwèbè.

¹⁷¹ Mpindyewu tàngilàayi Maalàkì 3:

Mònaayi, ndi. . . ntuma mùsànjeela wanyì, nè yèyè nèàlongololè njila kumpàlā kwànyì: . . . (Maalàkì 3, kì m'Maalàkì 4 to.)

¹⁷² Mpindyewu tàngilàayi Maalàkì 4:

Bwalu, mònaayi, ditùkù dilwalwa, diìkalà mwà kwosha bu mfuulù; nènku beena dyambu bònsò, èyowà, nè bònsò bàdì benza maalu nè lwonji abu, nebiikale bu bisònsà: . . . ditùkù dilwalwa nedìikalè mwà kubwòsha kubàbùtula, mùdì MUKALENGE wa bilwìlu wàmba, . . . kadyàkubàshùila ní muji anyi ditàmbà to (aci ncyà Dikènga dinène nè kabùtù, nwamònu's, bidì bilwa abi's).

Kàdi bwènù nwènù bàdì bàciina dinà dyànyì Dìbà dyà bwakàne nedìnùjuukilè nè dyondopa mu mapwàpwà ààdì (dilwa dyà Mukalenge); nènku nenùpatukè bu . . . nenùpatukè, nè nenùtumpikè bu twànà twà ngombe twà mu cikumbì. (Abi's mbyenze ànu bu kupàtuka mu mpàta, nuya pambèlu.)

. . . nwènù nenùdyatè beena lwonji ku makàsà; bwalu nebùikalè butù mwìnshì mwà bidyacilu byà makàsà ènù mu ditùkù dîngènza bwalu ebu adi, mùdì MUKALENGE wa bilwìlu wàmba.

¹⁷³ Mu ngaakwilù mukwàbò, baakàne, mu dyalukila nè Kilistò pa buloba, nebàdyatakajè butù ku makàsà. Panùdì numòna bantu aba, bàdibàndisha, beena dyambu, badyombodi bàà maalu, babwelakanyi bàà mu maalu à bendè, kàdi pààbò bàmba mùdìbo beena Kilistò, kabèèna cîngà cintu to ànu butù. Kwàjiki. Ke cìdì Mufundu wàmba ncyòcì aci. Nwamònu anyi? Mpindiyewu tàngilàayi.

Vùlukàayi. . . mikenji yà musadidi wanyì Mòsà, yîmwà mumutùmìnè dîyì. . . mu Holèbà bwà Izàlèlèlà mujimà, nè mèyì nè mikàndu.

Mònaayi, nènùtùmìnè Eliyà mupròfetà kumpàlà kwà dilwa dyà ditùkù dinène nè dìdì dikwacisha bwôwà dyà MUKALENGE adi:

Pabwìpì menemene nè Ditùkù adi, dyalukila dyà Mukalenge, Eliyà neàlwe dyàmbedi.

¹⁷⁴ Èyo, vùlukàayi nè, bicìkàle mu matùkù àcìlwalwà. Mpindiyewu, kacivwa mwà kwikala dilwa dyà Yone to. Yèyè ùvwa Eliyà, kàdi ùlwalwa misangu yìtaanu, mpindiyewu's. Y-e-s-u [J-e-s-u-s mu anglais—Muf.], d-i-i-t-a-b-u-u-j-a [f-a-i-t-h mu anglais], n-g-â-s-â. Nwamònu's, itaanu's nnombà wa "ngàsà." Eliyà ùdì ùmwènèka misangu yìtaanu: misangu kampàndà ng'Eliyà; bu Elishà; bu Yone; ku ndekeelu kwà bàà Bisàmbà byà bendè; nè kwàka nè Mòsà kùdì beena Yudà. Nombà mupwàngàne, mupròfetà mupwàngàne, mùsànjeelà mupwàngàne, wa dîsù dyumisha, nè bukitù. Nwamònu anyi? Mònaayi:

. . . Nènùtùmìnè Eliyà. . . kumpàlà kwà dilwa dyà Ditùkù, ditùkù dinène nè dìdì dikwacisha bwôwà dyà MUKALENGE:

Nè yèyè neàlujè myoyi yà baataatù kùdì bânà, nè myoyi yà bânà kùdì baataatù, bwà ncìlu kutuuta buloba nè mulawu to.

¹⁷⁵ Nwamònu's, kî ndilwa dyà kumpàlà dyà dileejiibwa adi to; awu ùvwa n'Yone, bwalu buloba kabwenàku bwôsha bu nsonà to, baakàne kacya kî mbendelekù pa butù bwà beena lwonji to. Kàdi ànu pabwìpì menemene nè cyòcì eci kwenzekaci, Elishà

neálwe. Kàdi cyènzàye ncinyi? Kwalujulula Diitabuuja dyà bàna kùdi taatù, Diitabuuja dyà ku cibangidilu dyà Bible.

¹⁷⁶ Pàndi mmòna muntu ùlwa, ndi ndyàmbidila nè: “Awu ùdi nè cyà kwikala yèyè. Kùdi kùjuuka muntu nè luumù lunène, mutàngilaayi's, èkèleeziyà yidisanga.” Cidiye wènza ncinyi? Udi kule nè Bible mu ntàntà wa kilòmèètà cinunu nè nkàmà yisambòmbò. Cidiye wènza ncinyi? Ùlalakana, ùpàtula mipùùya bu ndundu nè ùpwekelela. Nwamònu's: “Biikàle nè cimwènekeli cyà difwàna dyà Nzambi kàdi bàvila Bukolè bwàdi.” Bàvila Diitabuuja, kabàyi biitabuuja Bible to, bàmba, bàshààla kacya bakwàte ku twitabàayi, màngumba, bàlela bàna bàà cyena-màngumba. Cidi nè cyà kudishinda. Ke yèyè udi walukila wàwa's.

¹⁷⁷ Mwinè udi nè cyà kumyamina Dimiinu bwà Èkèleeziyà wa cikondo cyà nshiikidilu adi awu udi penyi? Dimiinu didi munkaci mwà kuboba adi didi penyi, Eliyà mulaya awu? Nènku dyakàmwe paanyimà pàà matùkù èndè ke pààtwàdija Dikènga dinène nè dyosha dyà buloba.

¹⁷⁸ Nè pashiishe ku dyalukila dyà Èkèleeziyà nè Mukàji-musèla, Mukàji-musèla nè Kilistò nebèndelè pa butù bwàbò abu, mu Bukalenge bwà bidimu cinunu, pàdi buloba bùkezùdiibwa ku kapyà. Nènku nebàkòòkeshile kuntwaku. Kàdi bampàngaanù bàtù kacya kabàyiku buumvwe Èvànjeeliyò abu nebàbùishiibwe mu cikjondo aci, nè bàna bàà Nzambi nebàmwèneshiibwè. Piikalàye nè cyà kukòòkesha, ùdi nè cyà kwikala nè cintu kampàndà cyà kukòòkesha, ùdi nè citùpà cyà buloba. “Nènku bààkalombola nè kukòòkesha nè Kilistò,” ke Kilistò kulombola matùnga, nè dikombo dyà cyamù cifiike. Dìbà adi Èvànjeeliyò... Dìbà adi bàna bàà Nzambi bamwèneshiibwe, nè bukòòkeshi ànu mùvwàYe naabù pàvwàYe pànwapa amu, nwamònu's, nekùlwe Bukalenge bwà bidimu cinunu mu Bukòòkeshi abu, nwamònu's, pa butù.

¹⁷⁹ Pa nànkù ndi mwindile cintu kampàndà. Ncitàfinuke mu bupwekele kàdi twètù bacipangile anyi? Nkujikè nè èkèleeziyà mmushààle mu mpèkaatù yèndè anyi? Byòbì nànkù, nànkù awu dìbà dikaadi diyè kupita munùdi nwènù nwela meeji amu. Byòbì kabìyi nànkù to, dìbà adi kùlwalwa kampàndà nè Mukenji wà wùpàtukila buludi mu Bible, nè mudimu wà lùkàsà nèwùnyùngulukè buloba bujimà. Mamiinu neàye mu bibejibeji, bintu byà dibala, too nè piikalà Dimiinu dyònsò didyànjlila kulongolola kùdi Nzambi adi diWùmvwè. Muntu nànsha umwe wa kùdibo kèna mwà kulwa pàdi Taatù kàyì mumukòke to, nè ewu yònsò udi Taatù mukòke neàWùmvwe nè neálwe. Ke cìikalàku, Dimiinu didyànjlila kulongolola nedyùmvwè Dìyi.

¹⁸⁰ Pashiishe pàdi aci cyènzeka, nekwikale didisanga pàmwè. Nènku Yesù neàmwenekè, nè nekùpàtukè Èkèleeziyà pa buloba bujimà mùshindù awu, nè dibiikà dyà ku lufù, wènda ùbànda.

181 Neciikale bu mwàkalwà Yone anyi, nè nànsha mene bayiidi basungula kabàyi bacìmanyè anyi? Bààkamba nè: “Bwà cinyi bafùndi bàdi bàmba nè Eliyà ùdi nè cyà kwanji kulwa dyàmbedi?”

182 Yèyè kwamba nè: “Ùkaadi mumanè kulwa kàdi nwènú kanùvwa bacimanyè to.” Kàdi kwamba nè: “Bààkenza cyàkambabò nè ncìvwàbo mwà kumwenzela aci.” Mukenji wèndè ùvwa wà lùkàsàlùkàsà be, tàngilàayi, kùdì Izàlèèlà mujimà, nè byàkenzeka ànu mu twab- . . . twaba tùbìdì—tùbìdì: ànu kwínshì kwà Yèlùsàlèlà nè kuntwaku, anyì kwínshì ku Aenonà kwàkaya Yone bwà kubàtiiza aku, nè ànu buludì kwínshì kwà musulù kwàkadì Yose ùbatiiza aku, musulù's wakuuma. Ànu ngondo yisambòmbò cyanààlà, ke dìleejiibwa dijimà dyà Maasiyà kubweladi buludì. Nwamònu anyì?

183 Tudi bapangè kumòna cintu kampàndà anyi? Dìbà dikaadi diyè kupìta mutùdì twètù twela meeji anyi? Eci's mmuyiiki wà mu ndòndò wà mwoyi mpindyewu. Eci cidi, ànu dilòlò edi, ànu bwà. . . Èyowà, cidi ànu—ànu twètù munkaci mwà kwakula kaaba aka. Dìbà dikaadi diyè bikolè kutàmba munùdì nwènù nwela meeji anyi? Mu bushùwà bwà bwalu ciwva m'Mukenji awu ku musùlù kwàka ditùkù adi anyi? Mmufinùnùke, kàdi bantu mba Wùpangile anyi? Ke Wòwù awu anyi? Dìbà adi bulelèlèlè dìbà ndimanè kuya kutàmba nè mutùdì twètù twela meeji. Necìkalè dìbà kaayi? Ncyèna mumanyè to. Ndifwànyine kwikala dilòlò edi. Mbifwànyine kwikala mu bidimu bikwàbò makùmi àtaanu. Ncyèna mumanyè nè necyènzekè dìbà kaayi to, n'èntùngunukè ànu nè kwenda kuya mùndì nya mpindyewu emu. Èè, n'cinyi aci? Ndi mwindìle cintu kampàndà anyi?

¹⁸⁴ Mwya mulòòte cilòòtà cyà pabwàci makèèlèlè dilòòlò awu, ncintàcishe bikolè ditùkù dijimà. Pa ciibidilu ncitu ntamba kulòòta bikolè to. Kàdi mwya mulòòte cilòòtà. . .

185 Mvwa mwà kuya myaba yônsò, bìvwa pa ciibidilù nè mvwa
mwà kukòbola Mukenji nè mufwànyine kumòna muntu apa
nè muntu kwàka ùWùbàkula. Mvwa mwà kwalukila kàbìdì nè
nkòbola Mukenji kàdi bèèla dyulu muulu bàkwàta njila bàya.
Bwalu bùdi cinyi? Mbamane kwenza mpèkaatù bapicìshe ditukù
dyàbò dyà ngàsà anyi? Muntu wa ndekeelu ùkaadi mubwele
anyi? Nkumanè kujika anyi? Tudi bashààle bindila ànu kabùtù
anyi? Mvità mikesè yônsò yidì yijuuka mùshindù awu eyi ncintu
munkaci mwà kudilongolola anyi?

186 Cintu kampàndà cìdì pabwîpì nè kwenzekà. Kumpàlà kwà
kwenzekaci, Èkèleeziyà neikale ùkaadi muyè. Mùshindù mene
wùndì nciyi ngùtaba bwà nè Èkèleeziyà neaye mu Dikenga
dinène's wè! Mmunyi mùdì mwà kufikisha cimfwànyì ku
dyumusha kantu ku mubidi wà bwalu? Nwamònu anyi? Noà
ùkaavwa mu bwàtù kumpàlà mene kwà dimata dimwèpelè dyà
mâyì kupònadi. Lotà ukaavwa mupàtuke mu Sodomà kumpàlà

mene kwà kapyà kupònakù. Nwamònu anyi? Yesù wàkamba nè: “Ànu mwàkadìbi mu matùkù awu ke mwikalàbi kàbìdì ku dilwa dyà Mwànà wa muntu.” Kabyèna bikèngela bwà Èkèleeziyà àpicilè ku cilumbulwidi to, ùkaadi mu Kilistò.

¹⁸⁷ Cidì citùkèngelà mbupwàngànè bwà bansantu. Bansantu kabèèna bùmvwà to, nwamònu’s, bàdi bàpeta. . . Kí mbamanyè ànu cyà kwelangana meeji to, nwamònu’s. Mpindyewu tudi. . .

¹⁸⁸ Piikalàbi nè ncyà bushùwà. . . Kabìyi nànkù to, kùdi kulwa cintu kampàndà nè lùkàsà lwònsò, nekwikalè dikùbàkùbà. Ndi munkaci mwà kutàngila, ncyèna mumanyè kwà kwela diinu nè kwà kwela dikàlò to.

¹⁸⁹ Makèèlèlè dilòlò mvwa mulòòte cilòòtà. (Pashìishe nkaadi njikija.) Mèmè kulòòta cilòòtà kampàndà, cintu cyà pabwàci menemene. . .

¹⁹⁰ Mvwa mulààdile panshì mwaba awu nyiikilangana nè mukàjàànyì, pa bidì bitàngilà cìcilwa-. . . Tucìvwa ànu tusambila, nè mèmè. . . Muntu kampàndà, Dallas mukesè ewu, ùvwa mubiikile nè ùvwa mudyèlè cintu kampàndà mu dicit, ke mèmè kubwela. . . Ùzònta mashi, nè kukèngelabi bwà kuyayè lùbilu kùdi ngàngàbukà. Ke mèmè kubwela bwà kusambila, ke Nyumà Mwímpè kwamba Yè nè: “Kakwèna bwalu to.” Nwamònu anyi?

¹⁹¹ Ke yèyè ulwàlwa ewu, mbímpè. Ngàngàbukà kwambayè nè: “Mòna’s, mvwa ndyàmbidila nè newikalè mwà. . .” Yèyè nè: “Udi mutàpe lutàndetande lwà dicit, lutaayike, nènku mashi àdi àpàtukamù, nè byònsò abi.” Ànu byònsò. . . Musangu wàkalondà wutwàkayà—wutwàkaalukila, yèyè kààkambakù kantu pa bwalu abu to. Kí mmumanyè nè ncinyi to, nwamònu’s, kishi nànsha kàmwè, cintu nànsha cìmwè. Nwamònu anyi?

¹⁹² Nànkù dībà adi muntu kampàndà ùvwa mubiikile, nènku mvwa mwà kubwela mu cibambalu amu bwà kusambila. Bu ditùkù òmwè pashìishe bàvwa mwà kubiikila, kwamba nè: “Nkujike. Bímpè nè bilenga’s! Kutùngunuka!”

¹⁹³ Nènku mvwa nyiikilangana nè mukàjàànyì, mèmè nè: “Munanga wanyì, kwenjì bu cidimu cijimà nè ngondo yìnaayi mbinkolèlè bwà kumanya kwà mèmè kuya.” Mèmè nè: “Ncyèna mumanyè nè ncinyi to.” Yèyè nè. . . Tuvwa twakula bwà cyà dyenza, mèmè nè: “Ncyèna mumanyè cyà dyenza to, ndi mwimàne munkaci mwà kudìkonka nè: “Tudi bindile. . .? Mupròfeta munène wa Nzambì udi ùmata mu cyalu bwà kubwayisha cintu awu, necimanyike patòòke anyi?”

¹⁹⁴ Mèmè kudyàmbidila nè: “Aci’s ncibèngàngànè nè Mifundu. To, cidì nè: ‘Yèyè ùdi ùlwa pa dībà dyùdi kùyi welela meeji to.’” Nwamònu anyi? Ke mèmè kudyàmbidila nè: “Ncyèna mumanyè cyà dyenza to. Tudi bapangè kucimòna anyi?” Mèmè kudyàmbidila nè: “Ncyèna muswè kushààla mulààle kumbèlu eku to.” Mèmè kudyàmbidila. . . Nè ndi ntèkemena nè eci

kacyèna munkaci mwà kukwàciibwa pa mikàbà yà mèyi to; byòbì nànkù, nùsùnsulè mukàbà wà mèyi awu anyi nùwùtèèkè ku luseke. Nwamònu anyi? Mpindyewu kwambayè, bu . . . Mémè nè: “Pìikalàbì nè eci ke cyòcì, tudi batàmbe kuseemena bikolè kupìta nè mutùdì twètù twela meeji.”

¹⁹⁵ Kùdì cintu cìmwèpelè cìdì nè . . . cìikalà mwà kwenzeka. Anyi cintu kampàndà cìdì nè cyà kungenzekela mpindyewu. Kàdì ncyèna mmòna nè mbwà cinyi Yèyè kàvwakù mundekele nya pàmvwà nsanganyibwa kwìnshì pa cibàsà aci ditùkù adi to, dībà adi, nwamònu's, kwòkò kakùyì cikwàbò cintu cyà dyenza to. Bwà cinyi? Mbwa cinyi ncyèna muyè? Cìdì cyeenzeke ncinyi? Kùdikù cikwàbò cintu cyà dyenza anyi? Mémè kudyàmbidila nè: “Èè, pìikalàbì nè m'Mukenji wànyì, bantu's kabààku Wùtàngila nànsha.”

¹⁹⁶ Pashìishe, Cintu kampàndà cìdì cìmbiikila ku madimi à bwambi à ku baabèndè. Ndi ngùmvwa dibìikila dyà dyàmwàmwa dyà mbù, dyùmukila ku myaba yònsò.

¹⁹⁷ Mukàndà mumfùdila kulwawù ditùkù adi, Mwanèètù Ligger ùdì munkaci mwà kufùnda mu—mukàndà kampàndà bwà masangisha à ku Durban. Yèyè nè: “Kacya kì mbumònapù kì mbwamba. Àfrikè kacya kàtukù mwanji kupeta dinyùkushiibwa bu nànkù to. Mu dilòòlò òmwèpelè buloba bwà mìmìdà bwà Àfrikè ebu bwàkapiçilà mu dinyùkushiibwa òvwàbò kabàyikù bânji kupeta kwònsò eku to kacya bààbàlela.” Ncyà bushùwà, munkaci mwà bampàngaanù amu.

¹⁹⁸ Mémè kupwekesha mèsù panshì apu, mémè kumòna bantu bafìike bakwàte nè byà luse abu, bantu bàà musinga mukolè abu, kumòna mùshindù wùvwa bantu abu bàbenzeja maalu ànu bu . . . bibi kutàmba nè bapika biinè. Mémè kumòna mwànà mukesè wa balùme kuntwaku uvwa . . . nènku mémè . . . ùkwàta mudimu kuntwaku, ke mémè kwamba . . . Mwànà wa balùme awu, udi ànu . . . Nwènù bakàji kanùvwa mwà kwenza mudimu mu matùkù àbìdì to [Katùpà kàà mukàbà wà mèyi munda mutupù—Muf.] anyi matùkù àsàtù, nè mwènù mwònsò munùdì mwà kwenza amu, ùvwà mwànà wa balùme awu nè cyà kwenza mu ditùkù òmwèpelè to. Ùvwà mwà kulààla pa cyàta mu cibambalu cikesè cyà disukwila bilàmbà, cìpacila metèlè umwe nè citùpà mu bule nè mu bucyàmà, ùdìtònya muntwamu. Nè bamufuta livre umwe ku ngondo, mbwena kwamba nè ndola yibìdì nè meeyà makùmi mwandamukùlù. Nè kàyì ùpeta mùshindù wà kudyà nkòtòtò yà ku mèèsà to, ndundu wa bukula bwà nsèke; cyàbisàtù cyèndè, bwà didyà dyà mu dindà; cyàbisàtù cyèndè ku didyà dyà mundaamuunyà; nè cikwàbò cyàbisàtù dilòòlò adi ku didyà dyà dilòòlò. Ùkwàta mudimu too nè pa dībà dikùmi, anyi dikùmi nè ùmwè, anyi dikùmi nè ibìdì jaajaja; ùjuuka mu dindà dìdì dilonda bwà kucyùka mwànà nè bikwàbò byònsò, nè kukolopa mu bibàndilu nè kusukula kàshinyi kàà mfùmwèndè wa mudimu. Kàdì maamù munène, wa kale, wa

katankù awu kàyì nè cidiye wènta nànsha címwè to ànu kacya wàsomba mwaba awu ùnoona nzàdi yà ku byanza nè ùnwa cyàyi, mwena lulèngù, kàyì bwànsongo nànsha bùmwe.

¹⁹⁹ Nsongààlùmè mukwàte nè byà luse awu ùvwa nè cyà kukwàta mudimu wà mukùsu muyè paanyimà. Ùvwa nè lukosò, nè ùmwèka bu nè ùvwa ànu bu nè cimpumpu, ùtwa mikèmu nè “*Humm, humm, humm!*” Dìngà ditùkù mèmè kwosha dísù kuntwaku, mèmè kwamba nè: “Kwènàku wangata nsongààlùmè awu . . . ? Bwà cinyì kwèna uya nendè ku disangisha?”

²⁰⁰ “Yèyè’s nkàfiirà.” [Katùpà kàà mukàbà wà mèyi munda mutupù—Muf.] Aci’s cidi cyùmviwija nè “muntu cyanààna.” Kabyèna bikèmesha to pàdìbo bàbuudya dìnà adi. Nànsha mèmè pàanyi, ndi mufwànyine kwenza nànu. Muntu awu’s mmwanèètù. Nènku’s ke yèyè awu. Yèyè kí mmupika to. Diikala dyèndè kadyèna nè bwalu nànsha bùmwe to. Yèyè’s mmwanèètù. Kàdi ke yèyè awu mùshindù awu.

²⁰¹ Mèmè kupàtuka, mèmè kumubiikila nè “Thomas.” Nsongààlùmè awu ùvwa mwà kwakula myakulu yìsàtù. Ke mèmè kwamba nè: “Thomas?”

²⁰² Yèyè kukudimuka, kutwàye binù panshi nè kwela byanza muulu, kwambayè nè: “Èyowà’s, mfùmù.”

²⁰³ Mèmè nè: “Juukilà kuulu. Mèmè ncyèna mfùmwebè to, ndi mwanèènù.” Mèmè kumwela dibòkò kunshingù. Kuntàngilayè mùshindù ewu, nè binsònjì binène bìpweka pa matàma. Mèmè kwamba nè: “Thomas.”

²⁰⁴ Ke Nyumà Mwimpè kulwa nènku ki cikèèna-kumòna eci. Mèmè kumwambila cintu kampàndà. Ke yèyè kwamba nè: “Èyowà, mfùmù. Aci’s ncilelèlè. Aci’s ke cìvwàci menemene.”

²⁰⁵ Mèmè nè: “Thomas, lukòsù alu lwàkushidi kaaba, kwakwikala kàbidi naalù to.” Nènku lwàkajika.

²⁰⁶ Bantu bamfinyika mfrangà mu mpaaya, mvwa nè tubèjì twà *livres* mitwè ku lùkàmà nè makùmi mwandamukùlù (mbwena kwamba nè ndola yìbidi nè meeyà makumi mwandamukùlù). Nènku mvwa nè bwòwà bwà kumupèèshayi; nè bwòwà bwà nè nkwepi kwàfwàna mfùmwendè wa mudimu kumusangana naayi, bààfwànyina kwela meeji nè mmuyiibè nè pashishe bààfwàna kumutuuta kumushipa. Pashishe mèmè—mèmè kwambila mfùmwendè, kwamba nè: “Ndi—ndi munangè mwàna wa balùme awu. Ndekèlèku mmupèèshèku ndambù wa mfrangà.”

“Kaa, to! To! Neùmwibidije bibi.”

²⁰⁷ Mèmè nè: “Nwènù’s mbanwibidije bibi be.” Nwamònu anyi? “Cinùdi badyadijile mwab’ewu ncinyi? Nè kanùyì nwenza cintu nànsha címwè. Nsongààlùmè awu ùdi wènta mudimu wònsò kàdi numulekela wàmba kufwà nè nzala. Yèyè’s ùdi nè—nè mamwèndè mukàjì mukàmba nè mwanààbò wa bakàjì

mwikàle ne butekète mu mubidi, nè pashiishe numupèesha ndola umwe... ndola yibìdì nè meeyà makùmi mwandamukùlù ku ngondo.” Mémè nè: “Dìngà ditùkù nenùnowè bwà cyôci aci! Kùdi miliyô yibìdì yà batòoke nè bafiike biipacila ku miliyô lukàmà. Nenùpetè dibinduluka dyà bantu.”

Yèyè nè: “Cìdì cyènzeka mwab’ewu aci, kucyàmbikù mu Àmèrikè to.”

208 Mémè nè: “Nganyì wàngambila bwà mémè kushààla mupùwe? Ànu Nzambi.” Mémè nè: “Kabyèna bikèmesha to pàdì bantu bapetè bundù, bu mùdibu bàbèza nànkù awu.” [Katùpà kàà mukàbà wà mèyì munda mutupù—Muf.] Ke bwalu mbwòbù abu’s. Ke mémè kutwà ku cyàbò.

209 Dìngà ditùkù bàmwè bambi, nè nkoolò yà mitèèlù mitùma paanyimà, biikàle nè mumfwèmfwè mukesè, kulwabò ku Rhodésie.

210 Mwendeshi kampàndà wa ndèkè mukesè wa kale kàyì mupilùlùke wakambweja mu cimwè cyà ku bipeepèlè bikolè byà mu matùngà à luuya abi, pashiishe kuyayè mu bule bwà kilòmèètà yisàtù mwàkamwènekàbi, muulu mu lupeepèlè, wènda ùkùdimukangana eku nè eku. Katùvwa bamanyè ní tuvwa nè mitù mitùma panshì; ndeke mwikàle ùkùdimuka misangu nè misangu. Nè ndekeelu wa byònsò cyôci... Katùvwa bamanye nè ùvwa ùbànda anyi ùpweka to. Ke ndekeelu wa byònsò kutùkùpayè pamutù pàà cipeepèlè cikolè apu. Cifù kàdi kunsàama patwàkatùlùlukamù!

211 Bàmwè bàà ku bambi abu, bambi bàà beena Mpenta, kubwelabò mu kàshinyi nè bàvwa bèndesha batàngile naanyi ku Pretoria. Mvwa mfùmìna ku Rhodésie wa ku Sud; kàdi mémè kupweka kuntwaku nè mvwa nsaama, nànsha bìshi. Nènku Mwanèètù Baxter musòmbè mwab’awu, ùsaama, nè Billy Paul, ùsaama. Nènku’s ke twètù aba tutùngunuka nè kwenda kwendesha tupicila mu bipangu amu; ke mwaba wùvwà bantu bàà bafiike bàvwà benze cintu kampàndà benzèjibwe bwà kuumuka mu bifuku byàbò, bwà mpèkaatù kampàndà wa mu cifuku, nènku bàvwa bàlwa muntwamu. Nènku kabààkubàànyishila bwà kubwela mu cimenga nànsha, nànkù bàdì ànu bàsòmbela mu mitàndà anyi cintu kampàndà cidibo mwà kukòokesha aci, nè bukooya bwà dikema nè bikwàbò, mbulelèlè. Nènku ke bóbò bàdì bàpwekà kuntwaku abu, kàdi ke mémè kumòna cimanyinu mwaba awu, cyàmbe nè: “Kilòmèètà makùmi àsàtù nè yibìdì ku dībà òmwè.” Kàdi bantu abu bàvwa bàya mu lùbilu lwà kilòmèètà lukàmà nè yinaayi ku dībà òmwè. Baamaamù bakùlākājì bakwàte nè byà luse abu bàlwa lùbilu kuntwaku kacya bàpya bānà bakesè abu, twānà tukesè, butakà, mu mùsèèsù mwāmwa, nènku kubangila ku bidimu bitwè ku bibidì too nè ku bitaanu anyi bisambòmbò;

bàpya bânà bakesè abu, nè bèèla mbilà mikolè. Mu cikondo kampàndà kwambayè kushipa bànaayi bàà ku bôbò.

212 Mémè kumutuuta cyaanza pa dikaaya, kwamba nè: “Ê! Mbwalu kaayi ebu neebè?”

Yèyè kukùdimuka, kwamba nè: “Uvwa wamba cinyi?”

213 Mémè nè: “Ngămbi nè: ‘Mbwalu kaayi ebu neebè?’ Tekèsha lùbilu lwà cintu aci!”

Yèyè nè: “Tudi nè mēyi matùma à kukufikisha kuntwaku pa dībà.”

214 Mémè nè: “Ndi nkutùmina dīyi bwà kucìmanyika.” Ke yèyè kwamba . . . Mémè nè: “Kwēna umvwilakù bantu abu luse anyi?”

“Bantu kaayi?”

Mémè nè: “Bânà bakesè kuntwaku baùvwa mwâmbè kuzaaza abu.”

Yèyè nè: “Mba-kafìrè!”

215 Mémè nè: “Bundù bwèbè! Ùdìbiikila mùdì mwena Kilistò ambà’s?” Mémè nè: “Kwēna mumanyè nè maamù ùtu wèlela mwanèndè meeji, bu wèwè mwà kumushebeya, ànu mùdì webè mamwèbè mufwànyine kukwelela meeji anyi?” Mémè nè: “Ùdi mwà kwikala mupangi nè kàyi mulonge kàlaasà to, kàdi dinanga dyà maamù didi dyela lubilà bwà mwanèndè wa mu dibòkò awu. Kwēna nè cyùdi mwà kwenzela cintu bu nànkù to. Wa bwalu udìbiikila mùdì . . .” Mémè nè: “Cikwàbò cintu, cimanyinu aci ncyâmbè nè ‘kilòmèètà makàmi àsàtù nè yìbìdì ku dībà dimwè,’ wanyì Bible mmwâmbè nè: ‘Pèèshaayi Kaayisà cidì cyà Kaayisà.’” Nènku kwinyikayè mutù. Mémè nè: “Pwekèshà lùbilu ku kilòmèètà makùmi àsàtù nè yìbìdì ku dībà dimwè nè tàngilà bantu aba byenze bu nè mbânà bèènù.” Mémè nè: “Bundù bwèbè, bwà kwenza cintu bu nànkù.” Kaa, ekelekèle, kudyùjabò bu ndimbà yìdya ntende’s! Kàdi kabivwa nè cìvwàbì bishintulula to, mēmè’s mvwa mwâmbè cyànyì cìvwà cìkèngela kwamba, cyànyì cisùusu.

216 Ke twètù kunyùngùluka kuya kuntwaku nè bantu kumanyabò nè mēmè mvwa mutwè ku cyàbò, bwà kubàtwàdila Mu—Mukenji wà Èvànjeeliyò. Nènku Nzambì . . .

217 Kulwabo muntwamu, nè kbasambakajabo kuntwaku, nè kutèekabò batòòke ku lusekè lùmwè, nè bafìlke ku lwàbò, nènku kwòkò aku bafìlke kabàvwakù nànsha mwà kubàmbila dīyi nànsha dimwè to, anyì cintu nànsha cimwè. Nyumà Mwîmpè ùvwa ùpàtuka munkaci amu nè ùpàtula babèèdì nè beena ntàtu nè bikalàbà, nè ùbwòndopa, nè kubàlekela basòmbe mwab’awu mu bundù bwàbù bunèné bwà bushàadile bwibaka kuntwaku. S’bìdì bìleeja mùshindù wùdì Nzambì ùkwàta mudimu nè bapwekèle mu mwoyi’s!

218 Mpindyewu, awu's mmuntu udi kàyì mwânjì kwakidila Mukenji kàdi munkaci mwà kufùnda mukàndà awu.

219 Mpindyewu, cìndì nè cyà kwenza ncinyi? Bwalu bùdi nè, cìndì nè cyà . . . Ndikù—ndikù nè cyà kwalukila kuntwaku anyi? Mpindyewu, piikalà Nzambi munkaci mwà kumbiikila ku butangadiki, dībà adi ncyèna mwà kwikala mwena lùmònò Wendè nè mutangadiki musangu wùm wèwùm wè awu to. Nudi ànu . . . cidi . . . Midimu ayi kayàakusambakanakù to, ndi—ndi ànu . . . Ndi ndwangana mvità nè lupeepèlè. Pangiikalà mutangadiki, nebikèngele ngiikale mutangadiki. Mèmè nè cyà kwikala mwena lùmònò Wendè, nenkasokòme ku mikùnà mwaba kampàndà nè kushààla kule nè bantu; kakùyì èkèleeziyà nànsha umwe to, kakùyì disangisha nànsha òmwè to, too nè pangùumvwà cyà kùdi Mukalenge; nènku mpàtuka ngènda ntwà mikùmà bwà kuCifila, nè ndyata kàbìdi lwendu ngàalukila. Nwamònu anyi? Cìmwè cyà ku bintu abi, cidi mu cipiminu. Anyi nkujikè. Cidi ànu nè cyà kwikala cìmwè cyà ku bintu bisàtù abi, bwànyì mèmè. Mukenji wàtù ku cibùngùbùngù anyi bikèngela ngàngatè cìmwè cyà ku bintu bibìdi ebi bwà kucyènza. Ncyèna mumanyè cyà dyenza to.

220 Makeèlèlè dilòòlò mvwa mulòòte cilòòtà, nènku mèmè kulòòta ngènda nya ku disangisha, kàdi kacya ncitukù mwânjì kumòna wàwa musumbà wà bantu to! Bávwa bakwingwile byenze bu mu cipalu cinène cyà manaya, bayè emu nè emu. Ke muntu kampàndà kulwayè kungangata uvwa kàyì Billy nànsha, nè kutùulukayè naanyì. Nènku mvwa nsanganyibwa mu cibambalu amu, munkaci mwà kusambila, ke mèmè kulwa ku . . . mu dilaabiibwa; mwenze bu mùtùbu bàcibiikila, bwà kunùfikisha ku dymvwa bìmpè, byenze bu dibweja dyà bìteshì mündi mwà kuumvwa nè cívwa ndijingulula. Nènku mu njila amu twenda tupweka muntu kampàndà awu kutwàdija kunyiikidisha nè, pààkenzàye nànkù, dijingulula kuumukadi. Ncívwa mwà kudyumvwa to. Ke pashìishe mèmè kuteeta bwà kudikòka bwà kwalukilamù; ncívwa mwà kucyènza to. Ncívwa ànu mwà kucyènza to. Ke mèmè kutàcishiibwa.

221 Ke mèmè kubanga kutàngila ku musumbà wà bantu awu pàvwàbo bènda bàlwa mu màshinyi apu. Nènku pàngàakacyènza, mèmè kwamba nè: “Èè, ndi nè cyena-bwalu mu meeji àànyì cìndì mumanyè nè malongolodi awu nè mùshindù wàkasubishàbo bantu abu awu, dībà adi nènyiishè Èvànjeeliyò awu ànu mùshindù awu kùdiibo mukolesha nè mwànyì mwònsò.” Kàdi pàngàakabànda ku cibumba cyà cyambilu, aci kunguumuka.

222 Kakùyì dijingulula, kakùyì wùm wè wà ku mikenji ayi to; ke mèmè kwimana mwaba awu, kàdi bantu pààbò bávwa ànu bindile. Ke mèmè kwamba nè: “Néngènzè cinyi?”

223 Nènku Cintu kampàndà kwamba nè: “Tùngunukà ànu

nè kuya. Tùngunukà ànu nè kuya, wamònu's," nebigidiibwe pangààfikà kuntwakwu. "Tùngunukà wèwè ànu nè kuya." Nwamònu anyi? Dìbà adi mwà nsanganyiibwa ànu mwaba awu mene ku cibùm- . . . ke mèmè kutàbuluka.

²²⁴ Bidi mwà kwikala nànkù bwalu mwà munkaci mwà kwela meeji ku cyòci aci, ke mèmè kulòòta cilòòta cyà mùshindù awu. Ncìfwànyine kwikala nànkù. Mbìfwànyine kwikala nè cilòòta ncyà nyumà. Ncyèna mumanyè to. Ncyèna nè dyumvwija dyàci to, ncyèna—ncyèna mumanyè cìdici cyùmvwija to. Ncyèna ànu mwà kunwàmbila to nè ncyèna—ncyèna mumanyè nè ncinyi to. Kàdi, cyònsò cìdiku aci, ndi nsanganyiibwa mu masangu à njila mwaba kampàndà. Nwamònu anyi? Kùdi cintu kampàndà, cintu kampàndà mwaba kampàndà.

²²⁵ Nènkù ndi—ndi mwà kwamba cintu cìmwèpelè, kàdi bàdi bàtamba kunguvmwà bibi. Anyi kwamba mùshindù *kampàndà*, ndi. . . bìdi mùshindù *kampàndà* anyi mùshindù *kansanga*, ewu ùcyàngacila ku luseke *kampàndà*. Nènkù mùshindù ùdibi, paùdi wamba cintu kampàndà ànu buludi pa bwalu kampàndà, nè muntu uCyùmvwà mùshindù *kampàndà*, nànkù ùlondela mukwàbò pèndè nè wèyemena luseke ùlaluka ndambù, nè udi ulonda awu wèyemena luseke ùlaluka ndambù, udi ulonda ùlaluka ndambù, dìbà adi Cikapàtuka buludi pambèlu pàà bwalu bwena diìnà. Ewu ùCyùmvwà mùshindù mukwàbò *kampàndà*, ùya mùshindù kampàndà, mùshindù kansanga, nè mùshindù kankènga. Nwamònu's, nènkù udi upàmbuka. Nènkù mùshindù awu ngùdibi mu—mu masangisha mwàmwa, nè bikwàbò, paùdi bulelèlè ànu ukafika too nè mu Mwaba kampàndà. Mpindyewu, Basungula mbafwànyine kuumwà Kaaba aku. Bàdi bàjingulula Kaaba aku! Mbamanyè, bwalu ndi mwambè ànu menemene cìvwàci cyùmvwija (Nwamònu anyi?) mùshindù awu, ànu Mukenji, ànu menemene.

²²⁶ Mpindyewu, nènkù ke cìndi ngàmba, bìdi bìmwèka bu nè kùdi dyumvwà dibì dyàbùngì dìbà dyònsò, kacya ànu dyàtùngunuka. Ncinyi aci? Cìdi. . . Ndikù mukùne Mamiinu ònsò àvwà nè cyà kukùnyibwa awu anyi? Dìbà dikaadi pabwìpì anyi? Mùsànjeela munène ewu udi pabwìpì nè kumata mu cyalu mpindyewu mene anyi? Dilwa dyà Mukalenge dikaadi pabwìpì anyi? Ndibìikila bwà kuumuka ku buloba ebu kuya ku bukwàbò anyi? Mmumbiikile bwà kuumuka ku butangadiki anyi?

²²⁷ Nudi bavùlùke nè, ndi. . . Mwà ncyàmbulwila mukàjàànyì. Bààbùngì bàà kunùdi mu mukàndà. . . Dìtùkù dīngààkatèèkà dibwe dyà mu ditumba adi mwaba awu, kùkaadi bidimu bitwè ku makùmi àsàtù, ànu lwà mu ditumba mwàmwa, byàkambiibwa mwòmò amu. . . Mu dīndà adi pààkambiishàYe ku tulù, nè mwà musòmbe mu cibambalu amu, nànsa mene kumpàlā kwà mèmè kusèlangana anyi ní ncinyi cyònsò, ànu muciiikale muiyishi wa citende, Wàkamba nè: "Enza mudimu wa

mutangadiki. Kí. . . Kuvwa mutangadiki to, kàdi enza *mudimu* wa mutangadiki,” mwikale ûntèelela Mufundu. Pangàakapweka lùbilu nè kumòna micì yìbìdi àyi, kucibula wùmwe *kaaba aka*, wà ba-unitaires nè ba-trinitaires. Ncyàkayisambakajakù to, ngakayikùna ànu mùshindù awu. Pashiishe kumòna Yè mamuma àmata mu cyanza cyànyì nè dībà adi kuya naanyì ku Kàlvariyo. Mpindyewu tèelejääyi, Yèyè wákamba nè: “Pawàpàtukà mu cyòci eci, ùbale Timòtè Mwibìdi 4, Timòtè Mwibìdi 4.”

²²⁸ Ki kunguumuka Ci mèmè musòmbe mu cibambalu amu. Ncivwa mene mumanyè nè cìvwa cìkèènà-kumòna to. Ncivwa mumanyè nè ncyà dìbiikila bishi mwinè musangu awu to. Mvwa ntèeka dibwe dyà mu ditumba (ditùkù adi) dyà cishìmikidi mwaba awu. Ncìfùnda, cìdi cìsanganyibwa ànu mu dibwe dyà mu ditumba adi mpindyewu mene, cyàmba nè:

. . . enza *mudimu* wà mutangadiki, enza cijaadiki mu kaabujimà cyà *mudimu* wèbè wà bwambi.

Bwalu cikondo necilwe cùkalàbo kabàyi mwà kutwàla dilongesha dishindàme to; kàdi nebalondè nkùkà yàbò bóbò biine. . . kudyùngwijila pàmwe mishiki bálongesha—balongeshi, biikàle nè maci àsansakana;

. . . nè nebàkome nyimà ku Bulelèlè bàya ku nsùmwinù. (Abu's mba-unitaires nè ba-trinitaires, mbapangile. . .)

²²⁹ Mpindyewu, Yèyè kàakambakù nè “udi mutangadiki to,” Yèyè wákamba nè: “Enza *mudimu* wà mutangadiki.” Nwamònu anyi? Mpindyewu, dībà dyàkùmbanyi anyi? Ndi nè cyà kutùngunuka nè cyòci aci anyi dībà ndikùmbàne bwà cintu kampàndà cìkwàbò? Bwà aci ncyèna mumanyè to.

²³⁰ Ke bwà cinyì mvwa muswè, kwenza neenù muyiiki wa mu ndòndò wa mwoyi. Nènku nkàadi mupicishe dībà dyànyì mpindyewu mene, dyà kunùlekela nuya, mfwilaayikù luse bwà kunùlama ntàntà mule mùshindù ewu.

²³¹ Kàdi, bu Mukalenge mwà kwanyisha, kumpàlà kwà Mwanèètù Boze kulwayè mu dyàlumingu, Ndi mwà kupweka mu dyàlumingu mu dindà nè kwakula pa cyena-bwalu cyà *Butangadiki Bwà Ku Ibaamulòòlò*, anyi cintu kampàndà cyà mùshindù awu, nwamònu's, byòbi. . . Mbikùmbane nànu bwèbè wèwè anyi, Mpaasàtà? [Mwanèètù Neville ùdi wàmba nè: “Mbìmpè! Nzambì àtumbè!”—Muf.] Bu Mukalenge mwà kwanyisha, mu dyàlumingu dilwalwà edi mu dindà. Nènku mvwa nè cyà kwakulapù dilòòlò edi, nènku mvwa nè cyà kwenza muyiiki wà mu ndòndò wa mwoyi pàmwàpa cikondo kampàndà cìkwàbò, kàdi ndi ndyùmvwa nè mbifwànyìnekù kwikala bìmpè mùshindù ewu, pàmwàpa, nwamònu's, bu cyòci ciikàle diswa dyà Mukalenge.

²³² Ndi nnùsambidila. Nsambidilaayikù. Kanwikadi—kanwikadi ànu nwamba nè: “Mwanèètù Branham, nèn sambilè

to.” Sambilaayi bushuwa’s! Nwamònu anyì? Mémè ndi mweyèmene aci. Mémè ke udi ukèngela disambila, bu Yèyè mwà kunsàkakù ku mwaba kampàndà. Vùlukàayi nè, mémè ndi muntu, ncyèna Nzambì to. Mémè ndi ànu muntu wetù ewu bu munùdì amu, nteeta bwà kupeta diswa dyà Nzambì bwà ngaamòna mwà kwendelamù. Muntu nànsha umwe kèna mwà kumanya to too nè pàdì. . . “Kàdi ewu udi mupangile lungènyì àlùlòmbe kùdì Nzambì.” Nènku ke cìndì ngenza ncyôci aci, ndòmba kùdì Nzambì. Nènku ndi ànu nnùpèsha cyôci aci bu èkèleeziyà wanyì, muyiiki wà mu ndòndò wa mwoyi. Ncinyì, tudi penyì? Tudi biimàne penyì? Tudi nè mwoyi mu dībà kaaì? Tudi ku cikondo cyà nshiikidilu, ngèèla meeji. Ndi ngiitabuuja nè tudi kaaba aka mene ku ndekeelu.

²³³ Mpindyewu, bìdì mwà kwenzeka mùshindù ewu anyì mùshindù mukwàbò. Pa nàнку nwénù. . . Anyì mudimu wànyì wàjiki, anyì ndi mubiikidiibwe bwà kuya mu madimi à bwambi dyàmwàmwa dyàdya, anyì Yèyè neàngénzè mutangadiki anyì mwena lùmònò. Cimwè cyà ku bintu abi cidi nè cyà kwenzeka, bwalu nkàadi ku ndekeelu. Ncyèna mumanyè cyà dyenza to. Ncyèna mumanyè nè njila kaaì wa kuya to. Nànsha masangisha aa mene, àndi munkaci mwà kuseemenakù aa, ndi munkaci mwà kusambila, ngàmba nè: “Mukalenge, ncyàkwenza mùmvwà ngenza amu to. Ndi nè cyà kucyènta ànu bu mungàakenza kale wàwa amu, nèngàalukile kàbidi ku butangidiki abu ànu too nè paWàmpeèsha dibiikila adi bwà cìndì nè cyà kwenza aci.”

²³⁴ Ndi—ndi mummyamìne Dimiinu myaba yònsò, mikàbà yà mèyi mmiyè pa buloba bujimà, Mayiisha àànyì mmayè pa buloba bujimà, èkèleeziyà yònsò mmimanyè bwalu bwàWù, mu myaba yònsò, nè bàdì Taatù musungùle Yèyè neàbàbìikilèku. Nwamònu anyì?

²³⁵ Kàdi mpindyewu’s mbimwèke ànu bu nè Cidi cibatacisha’s. Kaa, kì mbaswè kwikala naaCì bwalu to. To, mukalenge. Nèntungunukè ànu nè kuya bwà kusambidila babèedi, nè kaadiyiisha kakesè kapwekèle pa cyôci aci, nè—nè kumòna mùdì Nyumà Mwimpè undombola anyì? Ke cidi mu meeji àànyì bwà kwenza too nè pènzàYe dikwàbò dibiikila. Bwalu muntu kì mmumanyè cyà dyenza to too nè pàdiye ùmvwa cyà dyenza cìfùmina kùdì Nzambì, pàdiye ùmánya kaaba kàdiye.

²³⁶ Nènku ncyèna—nènku ncyèna muswè kujàànguluka ku nzùbu to. Mukenji ewu ùdì pa mwoyi wànyì. Bantu bàdì munkaci mwà kupùnga nè lufù, munkaci mwà kupàmbuka, bàkabwela ng Cyendèlèlè. Cìndì mwà kwenza ncinyì? Lekèlaayi ngÙkòbòle kwònsò kùndì mwà kukòbola aku, nè kwamba bwà Mukalenge Yesù too nè pàashintululàYe mwaba. Nwànsambidilaayikù, mémè nènùnùsambidilè. Ndi ntèkemena nè nenwènzè nàнку.

²³⁷ Mpindyewu, vùlukàayi nè mu diisatù dilòbòlò, kùdì

disangisha dyà milòmbò, nè mu diitànù dilòòlò, disangisha dyà bantu balùme. Nediikalè kaaba aka anyi? Ndi mwà kulwa bwà kunùmòna nwênù bònsò, mvwa munwàmbile nè mvwa mwà kulwa kunùmòna mu diitànù dilòòlò. Èyo, pashiishe mu dyàlumingu mu dindà, bu Mukalenge mwà kwanyisha, nêngaàkulè pa *Butangadiki Bwà Ku Ibaamulòòlò*, bu Mukalenge mwà kwanyisha; mmufwànyine kucishintulula, ncyèna mumanyè to. Kàdi's ke cindì ngèèla meeji aci bwà mpindyewu, mùshindù wà batangadiki biikalè ku ibaaumulòòlò. Nè pashiishe mu dyàlumingu dilòòlò, mukàbà wà bindidimbì wà Mwanèètù Boze, nènku nwavùlukaayi cyòci aci mpindyewu. Nènku nwatùsambidilaayikù, bwalu lumingu lùlwalwà elu tudi tulenga budimi bwà dinowa, bu Mukalenge mwà kwanyisha.

Nudi baMunangè anyi? Amen!

NenùMusadilè anyi? Amen!

NenùMwitàbùùjè anyi? Amen!

Amen! Amen!

Yèyè ke Taatù. Amen!

Yèyè ùdi Mwànà. Amen!

Yèyè ùdi Nyumà Mwimpè. Amen!

Amen! Amen!

tùtùngùnukàayi nè kwimba. Amen!

Amen! Amen! Amen! Amen!

Nudi baMunangè anyi? Amen!

Yèyè ùlwalwa anyi? Amen!

Udi mudìlongòlòle anyi? Amen!

Amen! Amen!

Mbifwànyine kwikala dilòòlò edi nè, udi mudìlongòlòle anyi? Amen!

Mu dindà, udi mudìlongòlòle anyi? Amen!

Dìbà kanà dyònsò, udi mudìlongòlòle anyi?

Amen!

Amen! Amen!

Ndi mutùngùnukè nè kwimba. Amen!

Nè ngèèla mbilà. Amen!

Nè nsambila. Amen!

Amen! Amen!

Lwàkù Mukalenge Yesù. Amen!

Longòlòlà Èkèleeziyà Webè. Amen!

Tudi munkaci mwà kudìlongolola. Amen!

Amen, Amen!

Ndi muswè kumòna maamù wanyì. Amen!

Ndi muswè kumòna taatù wanyì. Amen!

Ndi muswè kumòna Musùngidì wanyì. Amen!

Amen! Amen!

Kaa, nudi baMunangè anyi? Amen!

NenùMusadilè anyi? Amen!
Nudi baMunangè anyi? Amen!
 Amen! Amen!

²³⁸ Taatù wetù wa mu Dyulu, aka ke kèètù...kaamusambu kakesè kàà *Amen*. Tudi banangè dilongesha Dyèbè, tudi bônso twamba nè “Amen!” Tudi banangè Nyumà: “Amen!” Tudi twitabuuja nè Yèyè ùlwalwa: “Amen!” Dîyì dyònsò dyùdì Wèwè wamba mu Bible Webè, Mukalenge, tudi tuDìtwa “Amen!” Tudi twitabuuja Dîyì nè Dîyì dyònsò dyà ku Dyòdì adi, tuDilongesha ànu menemene bilondèshile dyètù dimanya, ànu mùdìDi difùndiibwe amu, kamanyishilu kònsò kàà mu difùnda, kashonyi kònsò, citùdilu cyònsò, kakòselu kònsò, ànu mùdìDi difùndiibwe amu, bilondèshile dyètù pèètù dimanya.

²³⁹ Éyì Nzambi, twálùjùlùlèku, Mukalenge. Tùpèèshèku disànkishiibwa dinène ditùdi tujingajinga adi, bwà twàmònakù mwà kumvwa dîngà ditùkù mpungi wa Banjèlò pààdidishàbo mu cipungulujilu cyà Àlèluuyàh mu maulu, piikalà Yesù mwà kumwènèka kuntu kwàka nè Èkèleeziyà mwà kwambwibwa.

²⁴⁰ Beena bupidyà nebàdikonke nè: “Cìdì cyenzèke ncinyi, mbwalu kaayi ebu nè bantu aba’s? Mbaye penyi’s?” Éyì Nzambi, kabààkumvwa to, kabààkuMumòna mene to. Kàdi Èkèleeziyà nèàMumòne, mbwena kwamba nè, babiikidiibwe bwà kupàtuka abu, Basungula, balediibwe cyàkàbidì abu, nebàjimine ànu cyanààna. Kabààkumanya nè bàdi penyi to, nebàmanyè ànu nè mbapangi; nebiikalè pàmwe nè Mukalenge wabò.

²⁴¹ Pashìishe pa diine díbà adi, Mukalenge, kî ncifwànyineku kwikala cintu cyà cikwàcisha bwòwà bwà kushààla pànu apa anyi, bamanyè nè cikondo cyà lupàndu cikaadi cimanè kupita? Kakùcyèna kàbidì bupikudi to! Mufundu mmwàmbè nè: “Ewu udi mukooyike ikale mukooyike, ewu udi kàyì wa cijila àtùngunuke ànu nè kwikala kàyì wa cijila.” Kaa, ndìbà kaayi diikalàci’s wè!

²⁴² Swàkù bwà tùdilongololè mpindyewu, Mukalenge. Cikondo cilenga kaayipu ciikalàku’s wè bu twètù ànu mwà kudilongolola bwà kutwilangana Neebè, Taatù, nè kulongolola myoyi yetù ku ditùkù nè ku ditùkù. Nènku twètù benzè cilèma nè badishinde, mùdì musùukà mukwàte nè byà luse ewu mufunde mu lukonko elu leelù, àmanyèku nè Mashì à Yesù Kilistò àdi àkèzula ku mpèkaatù yònsò. Muntu awu kèna nè meeji nè kwenza nànu to, Mukalenge. Ùdi nè nzala nè nyòòtà, ùteeta bwà kwalukila mu bwobùmwe bwà Nyumà abu. Bàjuulùlùlèkù, Mukalenge. Bàbàndishè pamutù pàà buloba bwà matutu, nè dibungama ebu; kuulu, kùdì Muunya mwà kukenkesha cyàkàbidì pa misùukà yàbò. Mbapwekè mwínshì mwà mu—mu—mushoonyi munène wà ku mikàlù yà—yà mavuba, nè bàdi kwínshì mu bitoci, kwínshì mu mpèkaatù awu. Kàdi bàvwa kale wàwa basòmbèle mu Bukènkè bwà díbà. Bòbò—bòbò mbaswè kwalukila cyàkàbidì,

Mukalenge. Baalùjakù dilòòlò edi, Mukalenge. Kàdi kwòkò kwikàle bàmwè kaaba aka bàtù kacya kabàyikù banji kulabula diikalamù, nè bamanyè nè. . .

²⁴³ Missilè yònsò eyi nè byònsò bìdi ànu bìpetangana menemene nè Dìyi Dyèbè, ànu menemene mùshindù wùdi bintu nè cyà kwenzeka. Nènku tudi tumòna nè bukwa èkèleeziyà, mwàkenzàbo amu. Tudi—tudi tumòna ànu—ànu mwàkadìbi mu matùkù à Noà, ànu mwàkadìbi mu matùkù à Sodomà, ànu menemene cyàkambà Yesù nè necyènzekè, mavwala à màyi à mbù awu, mùshindù wùvwà bakàji bafwànyine kwenda nè kuvwàla, nè mùshindù wùvwàbo mwà kwikala bàbwela mu maalu ónsò, nè—nè bènda, èè, mùshindù wùdìbo bènzà ewu, nè bàdinyònda nè bàjekeja nyimà, nè benza lukutukutu, ànu menemene cyàkamba mupròfetà. Ànu cyàkamba Danyèlè nè: “Cyamù cifiike nè díma kabìvwa mwà kupetangana to.” Nènku, kaa, byònsò, mbyùle, Mukalenge. Tudi ànu ku cikondo cyà nshìikidilu menemene. Mindìdimbi yìkaadi yìmata, Mukalenge. Makènke makunze àdi àpòdya, ngonga yìdi yìdila.

²⁴⁴ Éyi Nzambì, bantu Bèèbè bàmanyèku nè àbìdi aa Mwanjèlò nèateekè dikàsà pa buloba nè pa mbù nè kwela byanza Byèndè muulu nè kwamba nè: “Cikondo kacyàkwikalakù kàbìdi to!”

Dìbà adi Éyi, mmwadi kaayi nè ditwà dyà
mìkèmu,
Pàdìbo bàlondela bajìmine ndekeelu wabò;
Nebèlè mbwebwe nè mìkùnà mbilà,
Nebàsambile, kàdi disambila dìdi mu lujòòkò
lwa dikemà.

²⁴⁵ Mpindyewu ke ditùkù dyà lupàndu. “Ewu udi nè macì ùmwè cìdi Nyumà wàmbila maèkèleeziyà.” Enzàku nànkù, Mukalenge.

²⁴⁶ Swàkù bwà kakwikadikù muntu nànsha umwe kaaba aka wìkala mwà kujìmina mu ditùkù dyà Dyambwibwa adi to. Swàkù bwà twìkala batàmbe kùjiibwa nè dinanga dyà Nzambì nè Nyumà wa Nzambì too nè pìikalà Nyumà Mwìmpè mwà kutùumusha pàmwè nè bàdi bindile, anyi mene bu twètù mwà kwikishila mu cyètù citùpà. Bu muWàkambila Danyèlè nè: “Kwàta njila ndàaku, Danyèlè, bwalu wèwè newìkishè. Kàdi mu ditùkù adi newìmanè mu cyèbè citùpà.”

²⁴⁷ Éyi Nzambì, Wèwè wàkamba nè: “Aba bàdi bàkùdimuna bààbùngì ku...bùumuka ku mpèkaatù bàya ku bwakàne nebàbàlakanè kutàmba mìtootò bwà kashidi nè kashidi.” Ditùkù kaayipu's wè! Kàdi beena lwonji abu nebùumushiiibwè bàbwela mu kabùtù. Éyi Nzambì, fikìshàku bantu ku dimanya kaaba kààbò mpindyewu mene mu nsòmbelu wabò, bwà bààmònakù mwà kukùdimuka kùdì Mwakàne Awu kumpàlà kwà dìbà kwikaladi dimanè kupita bwà kashidi. Enzàku nànkù, Taatù.

248 Mpindyewu nè mitù yètù miinyika ànu bwà katanci kakesè cyanààná, mu disambila dyà ndekeelu, nkufwànyineku kwikala muntu udi muswè bwà kumuvùluka, wàmba nè: “Mwanèètù Branham, ndi mwelè cyanza cyànyì muulu, kî kûdi wêwè to kâdi nkûdi Nzambi. Nzambi ìkalèku naanyì luse bwà ngìikalèpu mu ditùkù adi, musukula mu Mashi à Mwànà wa mùkòòkò”? Nzambi àkubènèshè. Nzambi àkubènèshè, wêwè, wêwè, wêwè, wêwè, byanza byàbûngì.

249 Mpindyewu, Taatù wa mu Dyulu Nzambi, bèneshàku muntu nè muntu, muntu yònsò. Udi mumòne byanza byàbò. Udi mumanyè myoyi yàbò.

250 Nèku tudi bamanyè, Mukalenge, nè tudi...cintu kampàndà cidi pabwipi nè kwenzeka. Bàà pa buloba mbacimanyè, bàdi bìmba misambu, nè ntèlèviziyò yidi munkaci mwà kutaayika nè minèkù yà bupâlè nè misambu. Cidìbo bènza ncinyi? Byenzè bu mwànà mukesè wa balùme udi wela mwònzù mu midimà, wènda ùpita mu nkità, ùciina wàmba kufwà, ùteeta bwà kupòlobeja mijilu yèndè yà mutù mu dyela dyà mwònzù adi. Udi ànu munkaci mwà kudikùtakaja yèyè mwinè. Ke mùdì kàbidi ditùnga edi munkaci mwà kuseka, kuneka, kukenya, ànu bu mwàkambàYe nè cikondo cìvwa mwà kulwa cìikalabo mwà kwenza nànkù nè: “Nebàkudimukè bùùmuka ku Bulelèlà bàye ku nsùmwinù,” nè mùvwàbi nè “mu matùkù à ndekeelu nekùlwe beena tuseku nè baseki,” nè muvwa bintu ebi mwà kwikala ku cikondo cyà nshìikidilu, “beena mitù mikolè, badìbàndishi, biikàle nè cimwenekelu cyà difwànà dyà Nzambi, bakomè Bulelèlà nyimà,” nèku tudi tucimòna ànu mpindyewu mene.

251 Éyi Nzambi, juulàku bantu! Swàkù bàfike ku dyumvwa nè bàdi mwà kwikala batwishiiibwe mpindyewu mene nè mbuumùke ku lufù bayè ku Mwoyi. Patùdi twakidila Kilistò, Nyumà Mwimpè, tudi tujuukila ànu kuulu kwà buloba. Dîbà adi tudi tumanya nè tukàadi babiishiiibwe Nendè ku lufù, nè tudi ànu bindile dishintuluka adi mwikalà lufù mwà kwimana mu bipaapu byà cifwàkà ebi, tukàtà tukesè twà mwoyi wà cifwàkà tùdi tùnnyungulukà mu byumvwilu byètù etu, nebìpikudiibwè. Éyi Nzambi! Nèku pashiiishe netwikalè nè mubidi mufwànàngàne nè Wèndè nè netwikalè nè mwoyi Cyendèlèlèlè pàmwè Nendè, mu Buloba bulaya bunène, biikàle nè Cileejì.

252 Muntu nànsha umwe kàcipangidiku to, Mukalenge. Aba bàdi beele byanza muulu abu, swàkù bwà bàbwejiibwè (dilòòlò edi) mu Bukalenge. Pàmwàpa pààpinganàbo kumbèlu, pàmwàpa mulùme wàmabila mukàjèndè nè: “Munanga wanyì, cintu kampàndà ncindengè dilòòlò edi”; anyì mukàjì wàmabila bàyèndè nè: “Munanga wanyì, ndi—ndi mudyùmvwè mùshindù’s.” “Éyowà’s, munanga wanyì, tùtwebi binù kaaba aka ku luseke lwà bulààlù eku. Kacya katùtukù banji kwenza cyòci eci kwònsò

mwaba kampàndà wamba nè: “Mukalenge, ikàlàku naanyì luse.”
Aci kî nkukujingila cintu kampàndà cibi to. Aci’s mbwà bwimpè
bwèbè wèwè, mwanèètù wa balùme, mwanèètù wa bakàjî. Ndi
ànu nsambila bwà bìikaleku nànkù bwèbè.

Too nè patwàsangilà! too nè patwàsangilà!
Too nè patwàsangilà ku makàsà à Yesù; (Too nè
patwàsangilà!)
Too nè patwàsangilà! too nè patwàsangilà!
Nzambi ikalè neenù too nè patwàsangilà
cyàkàbìdì!

Nzambi ikalè neenù too nè patwàsangilà
cyàkàbìdì!
Ku mubelu Wèndè akulombòlè, àkukwàcishe,
Àkwipàcilè mavwala à mateeta kumpàlà;
Nzambi ikalè neenù too nè patwàsangilà . . .

²⁵⁸ Mpindyewu bwà bwena kale, tùlabulanganàayi ku cyanza nè
muntu kampàndà mpindyewu.

Too nè . . .

Mukalenge Yesù, enza . . . ? . . . mujimà, ùmushè kîshì aku
kàdi ùmupèèshè bukolè bwà mubidi, Mukalenge, mu Dîna dyà
Yesù.

Too nè patwàsangilà ku makàsà à Yesù; (Too nè
patwàsangilà!)
Too nè . . . ? . . .
Too nè . . .
. . . à Yesù . . .

²⁵⁹ Nudi bavùlùke nè tuvwa nè ciibidilu cyà kwimba misambu
ayi anyi? Twànjàayi . . . Nè mukwàbò ewu wutùvwà twimba kale
wàwa, kùkaadi bidimu byàbùngì, ncyèna mumanyè ní kùdikù
muntu kampàndà kaaba aka anyi to, patùvwà nè ciibidilu cyà
kukwàtangana ku byanza banyùngùlùkile dicyùwà dyà kale
mwaba ewu, nè bitocì panshì apu. Nudi bavùlùke aci anyi?
Tuvwa mwà kwimba nè:

Tudi twenda batàngile ku Siònà,
Siònà mulenga, mulenga kumòna;
Tudi twenda tubànda batàngile ku Siònà,
Cimenga cilenga kumònà cyà Nzambi aci.

²⁶⁰ Nudi bamanyè mu Bukalenge bwà bidimu cinunu ciikalà
Siònà anyi? Nèkwikalè Bukênkè mu Siònà, nè neciikalè bwà
mundidimbì wà ku dîbà mundaamuunya nè bu Bukênkè butùku,
bwalu kamwàkwikalakù butùku to. Kaa, ekèlekèlè!

Mpàtà yà Siònà yidi yìkwàma
Tulolo twà cijila cinunu
Kumpàlà kwà twètù kufika ku Nkwasa wa
butumbi wa mu Dyulu awu,

Kumpàlà kwà twètù kufika ku Nkwasa wa
butumbi wa mu Dyulu awu,
Anyi kwendela mu mìsèèsù yà ngòlò,
Anyi kwendela mu mìsèèsù yà ngòlò.

Bònsò cyàpàmwè mpindyewu:

Tudi twenda batàngile ku Siònà,
Kaa, Siònà mulenga kumòna, mulenga
kumòna awu;
Tudi twenda tubànda batàngile ku Siònà,
Cimenga cilenga kumòna cyà Nzambi aci.

²⁶¹ Mèmè ntu ànu munangè aci, ndi ànu ngèèla meeji nè
ncilenga bikolè. Mpindyewu, kanwènaayikù banangè misambu
yà kale ayi anyi? Ndi ngèèla meeji nè mmîmpè kutàmba bikolè
bintàkanyì byònsò bikòsoloja bitùdì naabì leelù bibìikidiibwa nè
mmisambu ebi. Ntu munangè ayi. Nènkù mvwa nè ciibidilu cyà
kwimba musambu wà kale mu èkèleeziyà, nudi bavùluke's:

Mwaba, mwaba, èyowà, kùdi mwaba,
Kùdi mwaba ku Mpokolo bwèbè wèwè.

²⁶² Kaa, èkèlekèle! Misambu mîmpè, yà kale ayi, ngèèla meeji
nè kasàlà kààkalombodiibwa kùdi Nyumà Mwîmpè, wàkafùnda
misambu ayi awu.

Peepi Neebè, Nzambi wanyì, peepi Neebè!
Nànsha byòbì nè nkùrusè ngwakanjuula.

²⁶³ Nànsha nànkù, Charles Wesley nè bafùndi banène abu
bààkafùnda misambu ayi mùshindù awu, beedi bàà tusàlà abu.
Mmilenga be, ndi ngèèla meeji nè mmîmpè be. Nè pashiishe
tuvwa nè ciibidilu cyà. . . Nudi bavùluke aci:

Kaa Buloba bwà Mukàji-musèla, Buloba bwà
Mukàji-musèla bwà kalolo,
Ndi mwimàne bu pa mukùnà mutàmbe
kutumbuka,
Ndi ntàngila dyàmwàmwà dyà mbù,
Mùdi nzùbù Yùdi mundongòlwèle.

²⁶⁴ Nudi bavùluke musangu wa kumpàlà wàkamwènèkà
Mwanjèlò wa Mukalenge ku musulù kwaka awu anyi? Tuvwa
twimba nè:

Pa myelelu yà Yadènè pàdì cipeepèlè cituuta
mpàndi mwimanè,
Nè ntàpa disù dyà majiyà,
Ku buloba bulenga kumòna bwà Kaanàànà nè
bwà disànkà,
Kùdi bìdì bu byànyì bisanganyibwa.

Ndi mu njila mutàngile ku buloba bulaya abu,
Nganyì udikù muswè kulwa bwà kuya naanyì?
Ndi mu njila mutàngile ku buloba bulaya abu.

265 Patùvwà munkaci mwà kwimba cyôci aci apu, Dîyì kweladi lubilà lukolè difùmina mu maulu, nènku ke Dikunji dyà Kapyà dinène dilwalwà edi dyènda dinyunguluka mu cijèngu dyènda dipweka nè dyàmba nè: “Ànu mùvwa Yone Mubàtiji mutùmìibwe bwà kudyanjidila dilwa Dyèndè dyà kumpàlà, wèwè udi nè Mukenji wadyanjidila Diibìdi.” Tàngilàayi kùdiwu muyè. S’kùkaadi bidimu makùmi àsàtù nè cìmwè. Tàngilàayi kùkaadiWu muyè kwambwila ànu dîbà adi, pa buloba bujimà mu kapyà kàà ditàbuluja. Nènku mpindyewu tudi tukàmòna kènda kàpweka. Cikondo cìkaadi pabwîpì.

266 Twînyikàayi mitù yètù mpindyewu, tuvùluka mamanyisha ònsò.

267 Mulami munène wa cisumbù cyà mikòòkò, utùdi bindile bwà kumòna ùlwa ditùkù kampàndà, myoyi yètù yìdi yìjinga dîbà adi patwàMumòna. Dìngà ditùkù Wèwè kusòmba pa mukùnà nè Wèwè kulongesha bantu Bèèbè, Wèwè kwamba nè: “Sambilaayi mu mùshindù ewu:”

Taatù wetù Udi mu Dyulu, Dîna Dyèbè dîjidiibwè.

Bukalenge Bwèbè bùlwe. Diswa Dyèbè dyènzekè pa buloba, bu mùdidi dyènzeka mu Dyulu.

Tùpèèshèku ditùkù edi dyàmpà dyètù dyà bwàcyàbwàcyà.

Nè tufwilèku luse ku matomboka ètù, bu mutùdi tufwila aba bàtù bàtwènzela matomboka luse.

Nè kùtùlombodiku mu diteeciibwa to, kàdi ùtùsùngilèku ku bubì; bwalu Bukalenge m’Bwèbè, nè bukolè, nè butùmbi, bwà kashidi. Amen.

268 Bible mmwàmbè nè: “Nè bààkimba musambu nè bààkapàtuka.”

Angàtà Dîna dyà Yesù wèndè naadi,
Wèwè mwànà wa tunyinganyinga nè dikènga;
Nedikupè disànkà nè busàmbi,
Nda naaDì kwònsò kúyaayàà.

Dîna dyà mushinga, Éyì dyà bupòle be!
Ditèkemena dyà buloba nè disànkà dyà Dyulu;
Dîna dyà mushinga, Éyì dyà bupòle be! (Dyà bupòle be!)

Ditèkemena dyà buloba nè disànkà dyà Dyulu.

269 Aci kacýèna cyùmwikakù cilenga anyì? Anji imànaayi ànu kakesè, ànu kakesè apa nè pààpa, kàdi citèèlejaayi cyàkàbìdì patùdi twimba apa:

Twinamina Dîna dyà Yesù,

Tupòna mikookwela ku makàsà Èndè,
(Nwamònu anyì?)
Mfùmù wa bamfùmù mu Dyulu netùMwasè
cifulu cyà butùmbi,
Pààjika lwendu lwètù.

Kaa, abi kî mbilenga anyì? Tùmonààyi:

Angàtà Dîna dyà Yesù wëndè naadi,
Bu ngabu ku butèyi bwònsò;
Pààkujìngilà mateeciibwa ku nseke nè ku
nseke,
Nungànà ànu Dîna dyà Cijila adi mu
disambila. (Nwamònu anyì?)

Éyì Dîna dyà mushinga! Tùwímbààyi:

Angàtà Dîna dyà Yesù wëndè naadi,
Bu ngabu ku butèyi bwònsò;
Pààkujìngilà mateeciibwa ku nseke nè ku
nseke,
Nungana Dîna dyà Cijila adi mu disambila.

Éyì Dîna dyà mushinga, (Dîna dyà mushinga!)

Éyì dyà bupòle be! (Éyì dyà bupòle be!)
Ditèkemena dyà buloba nè disànkà dyà Dyulu;
Dîna dyà mushinga, Éyì dyà bupòle be! (Dyà
bupòle be!)

Ditèkemena dyà buloba nè disànkà dyà Dyulu.

²⁷⁰ Mpindyewu, bu twètù mwà kwinyika mitù yètù, mpaasàtà
wetù neatangalajè disangisha mu disambila. Nzambì
àkubènèshè, Mwanètù Neville. 

62-0527 Nkonko nè Mandamuna
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org